

出使日記續刻

出使日記續刻卷之三

無錫薛福成叔耘

光緒十七年辛卯十一月辛酉朔記

爪哇中東西三段共二十三省方十三萬七百十四啟
羅邁當華民十九萬八千二百餘人泰西二萬八千六
百餘人土番一千八百五十五萬九千五百餘人此光
緒五年清冊也七年增至一千九百十二萬九千餘人
內有陸軍泰西人一萬六千八百餘名土軍一萬六千
二百餘名水軍西人二千八百餘名土兵一千六百餘
名其計水陸軍三萬七千六百餘名居民耕種稻田居

十之五。其他田地則又倍之。產米雖多。尙不敷本地之食。近來商務日盛。光緒七年出口貨值法銀四萬四千萬佛郎。以糖煙藍靛加非錫爲大宗。進口貨值法銀三萬五千八百萬佛郎。創設鐵路於巴達維亞三寶壠蘇拉巴亞各埠。其長五百六十二啟羅邁當。皆由官經辦者也。倫敦報館接北京電云。中國鬧事有二處。一在奉天之錦州。一在開平北之大口。官軍已出山海關赴錦州。天津淮軍由輪車駛往大口。該處教民三百餘名。皆被戕害。比利時教士亦無免者。

初二日記

巴達維亞在爪哇島北岸西邊左爲萬丹右爲井裏汶中國稱爲噶羅巴爲爪哇之會城明萬厯四十七年荷蘭總督在亞細亞各島尋駐紮之所遂據其地明年建城改稱今名現有華民三萬三千人居於城河西岸街道店鋪宛有粵東風景合散處各地者在內則共有七萬二千五百餘人三寶壠在島之中段北岸瀕爪哇海城建於三寶壠河口西距巴達維亞四百二十啟羅邁當華人居於城之上游三寶壠河左岸現有一萬四千二百餘名蘇拉巴亞在島之東段北岸卽志略之士里莫今作泗里末華民一萬一千七百餘人

初三日記

阿富汗一國在北緯二十九度至三十五度巴黎東經

五十八度至六十九度其地自北而南約計一百四十

利月

每一利月約中國八里

自東而西約二百利月大小與法國

相等東以蘇來芒山爲界此山縣立向北直至新河之

拜石費愛山爲止與英之印度分界南爲俾魯芝西爲

波斯之勾拉上省北爲沙漠及印度孤司之雪山

一作興都

哥士或作興杜庫施實印度身毒之轉音也

大勢分爲四部一爲加布利思

當部二在蘇來芒山之東因人迹罕到知之不詳三爲

岡大亥部四爲射思當部

加布利思當志略作喀布爾阿富汗都城也岡大亥作堪

達哈爾明思當作濟斯尼全境地而高山居其五分之四論其形勢
實山上之平原地也最高之峰名大克約蘇來芒合英
尺一萬二千八百三十一尺合三千九百十邁當山頂
亦有平原之地爲數大河發源之所東北一帶與中亞
細亞之高地相接由孤司嶺直接至西麻來亞山供圖
馬拉雅嶺即中有無數高峰有過二萬英尺以上者
西藏最高山

初四日記

阿富汗除加布勒愛力孟兩大河之外小河頗多又有
無數小河自山發源流行平地爲沙土所蝕不能通至
大河愛力孟河自山而下勢趨西南河長約二百利月

他水來會者甚多。併流入一大湖。湖名阿離亞巴累。又名射魚當。又名阿們。而加布勒河身最大。長七十五利月云。地勢既高。天氣寒冷。青草不能蕃盛。物產以毛貨爲大宗。以織成之各種毛布爲最佳。貿易大路。東與印度相通。西北與中亞細亞俄羅斯相通。另一路與波斯相通。土貨出境者。曰顏料。乾果。鮮果。絲煙。羊毛。鉛。硫磺。馬駝。西刻接總理衙門來電云。十月十七夜。熱河朝陽。建昌等縣。突有金丹教及在理教匪。揭竿爲亂。蒙古敖罕。旂貝子被戕。建昌平泉居民多被搶殺。天主堂亦被燬。殺華教士一名。華教民多命。臺奉。

諭旨飛飭北洋大臣東三省將軍迅派馬步隊赴剿歸
直隸提督調遣二十四日小獲勝仗各路軍兵厚集不
難撲滅惟口外教堂甚多法使不願地方豫查亦不列
單知照本署直不識該堂設立何處此時事起倉猝只
有飛電北洋飭令派出將領保護其告急而未遭害者
如永平遷安各堂亦派練軍駐守並嚴札地方文武保
護祈轉達英法外部並分電許崔

初六日記

總理衙門九月初四日函云俄兵瞰邊一事前以英使
來告卽電詢竹筴覆電謂事屬子虛八月初英使復面

稱俄確有副將遊獵帕米爾。圖據其地。如地本屬華。冀
我自保。權勿旁落等語。因又電石泉制軍。轉行新疆。派
員酌帶弁兵。前往巡歷。察看情形。與其部長聯絡羈縻。
俾爲我用。並電竹筴。詰問外部。旋接覆電。外部仍以遊
獵爲詞。顯係掩飾。近接新疆來咨。六月間。塔什干總督
帶馬步三百餘。聲言赴帕巡閱。徑出華屬黑孜吉牙克
卡蘇滿卡。阿克素睦爾瓦卡。及塔敦巴什等處。並駐隊
蘇滿等卡。且於筆依比達坂。豎立木杆。阿克他什黏貼
俄文。安撫阿克素睦爾瓦及黑孜吉牙克。聲稱今已屬
俄等語。以上皆係華屬卡倫。樊籬不固。隱患何所底止。

昨電竹簣轉告外部速電俄督將越境兵隊撤回復接
竹簣電云外部言塔什干兵已回並允轉告彼督以後
勿令弁兵越界所立木杆聽由華官撤毀又石泉制軍
電云魏護撫電喀道接張旂官稟俄越我外卡兵勇已
全撤回地方安靜塔什干督祇到阿拉依未入華屬惟
俄兵頭擅給華屬回諭帖派充伯克

初七日記

教堂各案蕪湖一起七月二十一日皖撫電稱法教士
戴蘭第滬白祿兩人於賠款外添索近堂之識舟亭地
又名八角亭卽鶴兒山又領事署旁山嘴一塊已飭道

將索地事另辦勿牽台正案以期速結李梅抵滬後八月二十日聶道與教士現議若以地近教堂防人作踐可圈築圍牆派守殊屬兩便已電李梅李覆云已飭總領事與聶商旋據聶電圍牆已允仍索兩地爲墳種樹不建屋是以未能簽字議結賠款十一萬一千員亦未付丹陽天主育嬰各堂被焚事江督咨稱現與司鐸施方禮議賠八千四百兩三期交清七月初九立議單完結通州如皋案七月廿八江督咨稱如皋賠四千兩豐利賠五百兩莫令另出三百餘員添補買堂完案並據領事函代各教士鳴謝陽湖案八月廿三接江督咨給

洋一千四百九十一員。七月十一完案。金匱三里橋一案。彭安多初索甚鉅。後減至六萬六千員。添索教堂西首同源興及望亭基地。並將前置各縣教堂公產一體稅契均經完結。江陰議賠九千員。無錫七千員。均咨報商妥。此南洋賠款大略也。至蘇屬教案。共獲犯二十一名。訊係附和愚民。從重定軍罪二名。徒杖五名。枷杖十四名。並獲會匪曹義祥一犯。訊係同謀。燬堂卽須嚴究重懲。一面嚴緝餘匪。丹陽令已參革。無錫江陰陽湖金匱令均摘頂。如皋令記過。各該管汛弁亦摘頂。此南洋參劾屬官大略也。

初八日記

湖北武穴一案。鄂督電稱所獲各犯。領事派教士觀審。照歐人致死律擬抵。郭戴二犯於絞罪上加重斬梟。從犯分別重辦。領事允服外。與關道議三條。一龍坪司巡檢及礮船哨弁請獎。一馬口司巡檢請摘頂。一廣濟令前請撤任。請勿庸議。均允之。又咨稱卹款商定四萬員。賠修二萬五千員。領事函稱未奉駐使札復。先收照會。暫不收銀。總署於八月十六照會華使主持。迄未接復。各案市有頭緒。忽又有宜昌之事。江督電稱七月二十九日宜昌游姓失落小孩。在聖母堂查出。又搜出男

女六十五人。內有數人閉戶。堂內及西人住屋旋即火起。縣鎮護教士上船。法國巴教士被石傷額。已平復。訊據女教士云。孩係吳有明抱送。曾給吳錢二千。現懸賞緝犯等語。英法以此事各派兵輪前往。江督電商派撥兵輪自護。北洋派兩輪往滬。遞換南輪赴鄂。南洋派南瑞駐鄂。測海往來遊巡。

初九日記

滬電云。官兵與叛匪遇於朝陽城外十五米爾之遙。官兵四千五百。叛匪三千。大半馬隊。甚形勇敢。約戰兩時。許官兵以礮火衝之。叛匪陣亂。且戰且退。死者一千一

百人。葉提督亦受微傷。官兵追寇甚勇。賊竄入山內。

初十日記

梅生私運軍火一事。英領事以案無原告。不能會審。須令見證人作證。始可延請律師。總理衙門商之南洋。案由滬鎮兩關盤獲。該稅司及洋關委員均可作為見證。八月十四日。聶道與裴稅司訊錄梅生。即梅川又口供名翼升二十六日。赫德又將梅生與裴稅司所談節略。送到總署。大抵謂洋人入會甚多。鎮江各處購藏軍火不少。並牽涉鎮江委員陳興嗣。焦山礮臺兵官易某。並譯六洋人名姓。曰秦森。曰計因。曰馬革里戈。曰莫里森。曰里得。

曰敖斯瓦而滬關譯出勞稅司面交梅生雜記內。又有約福建海關細恩徐春山鎮江細恩徐春庭起事之語。並未敘及陳易。此事亟應澈究。乃英領事既託詞推卸。華使復文絕不提及。赫德言華使先欲派員往辦。繼謂滬關既經拘訊。卽不與聞。而領事接外部電。令其國家律師威金生主控。梅已拏禁。律師謂須押候。繕供齊後審訊。九月初。又據法使及赫德到總署。言福州羅星塔有匪徒謀踞船廠。天津紫竹林洋人夜半忽然驚徙。德稅司復於進口之太古輪船名松江查獲來復槍五百桿。不悉私販姓名。船主已罰五百金。似係私販圖利。無

從根究。滬道知照領事。將船主及大小副水手買辦人等研詰究辦。並咨粵督。照會港督。查察華洋商及各輪船嚴防私售軍火。福州城內洋人亦一夕數驚。密查實無匪黨蹤迹。

十一日記

李傅相來函云。洋人入內地傳教。民教往往構釁。地方官拏犯賠堂。百姓輒指爲偏護洋教。愈激愈怒。若稍寬宥。各國公使領事據約力爭。謂地方官不加保護。其尤難者。民間紛紛傳說。謂教堂慣用邪術。挖眼剜心。迷拐幼孩。誘姦婦女。種種藐法之事。官旣無從得其確有此

事之實據。以折服彼族。亦無從得其確無此事之實據。以解釋羣疑。惟有忍心害理。專用刑罰。祇求目前了事。不顧日後隱憂。官吏豈盡無良。蓋勢有不得已也。西人傳教。雖條約所許。而民教不和。勢同水火。終非久計。同治四年。法國洪主教移川省會審局員文內。謂川省教民事務。設局經理。各案將盡完結。欲弭未形之患。宜爲先事之防。酌擬規條。俾期永久。曾經成都將軍咨達總署。可見民教不睦。教士亦懷畏心。乘機訂立妥章。所謂因勢利導也。本年沿江教案疊出。前有樊安兩主教託津海關稅司德雅琳呈遞節略。言中國傳教約分六路。

以六主教總之擬請先由教王分派承充遇事准與地方官商辦。隨後再由教王遣使駐京。無須法國照料。教務常易辦理。法國每遇教案。輒以兵船挾制。教王無兵。固無此慮。倣處曾將其函送總署。如能辦到。教務或有裨益。然教王所轄。僅止天主教。英德美等國所習之耶穌教。並不在內也。

十三日記

勒當報云。中國

皇上現習英國語言。總理衙門上摺諫阻。

皇上置諸不理。蓋有

皇太后之鼓勵故也。仰光電云。猛卯中國官場似有

煩鬧之事。因英人在南邦江。似卽太平江一作達冰江又作檳榔江或作紅奔江

設立兵房。該處土民驚惶。行文英官。請其撤去。英官告以奉印度總督之意。不能撤退。又稱已商准。

中朝。許其在此設立兵房。保護商民。卽指此猛弄與南邦也。南邦地方已添英兵二百。猛弄亦添兵矣。

十五日記

九月二十六日。卽東歷十月二十八日。日本神戶大坂。迤東直達名古屋。地大震動。以致火輪車脫軌。電竿亦悉偃仆。數百里內。死者二千七百餘人。傷者三千四百

餘人毀房屋三萬五千餘戶。半壞者約九千戶。英德兩國鐵路五年以來。德多於英。光緒十五年。德有鐵路二萬四千八百五十二英里。英有鐵路一萬九千七百七十六英里。若以人數土地相較。則德法鐵路較英尙少。而造路之費。德廉於英。獲利遂厚。然英路雖少於德。五分之一。所備客車貨車汽車。皆多於德。德之汽車。歲得英金四千二百七十六鎊。英汽車歲得四千四百四十四鎊。客車之費。前一年英得三千零九十八萬四千餘鎊。德僅得一千五百四十九萬六千餘鎊。蓋德國之人。雖多於英。約有千萬。而富者較少。故乘車者亦少也。

德路每英里經費一萬七千三百餘鎊。英路每英里經費三萬七千四百餘鎊。

十六日記

蕪湖教案已由滬道會同法總領事華格臬商辦妥洽。教士前索之鶴兒山一層作爲罷論而略加償款。九月十八日訂立合同三條。一議賠償教士規平銀十二萬三千六百五十四兩。由上海道交付法國主教。一蕪湖教堂西北毗連之高地一塊名八角亭。卽繫舟亭。應由華官自行圍築堅牆。須高一丈二尺。其牆如何定界。由地方官會同教士相度地勢。妥酌辦理。自圍之後該地

不准起造房屋出入閒人。並由華官派人看守。自行管理。三准教士在教堂左近。隨時自與百姓妥商購地。地方官按照條約。幫同辦理。

十七日記

西教士韋立生偕洋友二人。金陵友二人。至甯波售賣教中書籍。由象山石浦而抵南田。九月二十四日。過蜆蜑峽地方。適有土人掘沼。深至八尺。下卧石碑。字式甚古。韋立生見而愛之。因將隨帶印像機器。如法印出大字六箇。小字五箇。均古體隸書。金陵戴友能識其文。爲言碑中。大字乃越英王諸鄂墓。旁小字則嗣王二年表。

云其石碑霉脆如灰有形無質再掘其下亦無棺木骸骨想係周時古墓故黻朽不堪如此而適遇西人掘印其文精存人世則似有鬼神呵護留待賞音也奧使於本月初十日在承光殿覲見

皇上先是法俄二使將遞國書請在宮中首殿奉

旨。在承光殿定期初十日。法使稱病。俄使竟言有礙國體。仍照前錄送副本。臨時將覲事奏罷。洋使好事挑剔。日甚一日。可慨也。又閱昨日巴黎費格羅報云。法使李梅於中歷十五日見

大皇帝。此次在便殿召見。非進貢使臣之所。蓋用最優

禮貌以相接云。哥老會匪創立某山某水某堂名目，散給飄布，傳授口號，妄謂入會之人，出外有人保護，有事可保身家，藉以斂錢惑眾，愚民受其誘脅，同罹法網。欽奉

諭旨，著嚴飭地方文武隨時留心實力查緝。如有訪獲會匪首犯，一面嚴行懲辦，一面准將出力員弁照異常勞績隨案奏請優獎。地方良民有誤買匪徒保家偽票，呈繳地方官者，免其治罪。其有向充會匪自行投首，密報匪徒姓名，因而拿獲者，亦一律宥釋，准予自新。

十八日記

李傅相來書云。執事移總署書。謂帕米爾部落。檢文卿
新譯中俄交界圖。在中國界綫之外。亦非俄屬。暨撫魏
午莊電。帕米爾地名甚多。現英使所指俄兵所到之地。
則在喀什噶爾西南。爲各外部入華孔道。該處布回
皆係中屬。不僅黠縻。饒子惟來函。帕米爾長千餘里。在
烏斯別里以北者。屬俄。以南曰大小帕米爾。爲中國與
什克南交界。英人什人皆知之。不惟非俄屬。並不交俄
界。文卿新譯圖。正在舒克南與中國交界處。其攷訂頗
足證明也。

十九日記

英之本國有英倫·蘇格蘭·愛爾蘭三島之地·英倫幅員計五萬七千九百六十英方里·人口一千四百十八萬有奇·大部落五十三·小部落四百八十五·蘇格蘭則西歷一千六百零三年·英始滅之·以伊靈馬社爲首部·合計三萬九千六百英方里·人口二百三十六萬三千八百有奇·大部落三十·小部落三百三十八·愛爾蘭一島·在倫敦西少北·先爲法蘭西所闢·繼屬丹馬·後乃屬英·以臘墨領爲首部·合計三萬英方里·人口七百七十六萬七千四百有奇·大部落三十二·小部落四百四十二·而其所割據之屬地·則地中海島有·人口十四萬·阿非

利加海濱新地有人口三十五萬三千五百。印度各藩屬有人口八千餘萬。美洲加那大有人口一百二十萬。其洲東羣島有白黑居民八十二萬。而澳大利亞一洲及北般烏等島尙未計也。今大下有居國。有行國。英國之在五大洲。散收諸屬地。則非居非行。遙遙相制。以師船爲藩衛。以商船爲生聚。則謂之行國亦可也。

二十日記

奧法俄三國使臣先後入都。應以抵京先後爲序。依次覲見。惟各使以紫光閣爲接見蒙古外藩之地。迭啟爭辯。總以改擇合宜之地爲請。經總署上遞封章。請

旨酌裁。嗣由署迭與奧使和衷商榷。擬改於西苑圍城
中

承光殿觀見。此殿不僅外藩所未至。卽中朝臣工亦不
克輕到。彼此議定。簽押立案。又上封章奉

旨著於九月二十五日在承光殿觀見。欽此。以後不知何
以改在十

十一月初 屆期九點鐘。奧使畢格哩本率繙譯官赴西苑。
由三座門入。與總署堂司官相晤。卽同進琉璃門。於值
房少憩。逾二十分。

皇上駕臨承光殿升寶座。堂官偕使臣繙譯人昭景門。
至承光殿。由殿東門趨進。初進殿時。畢使繙譯向上行

一鞠躬禮前行數武復一鞠躬至龍柱間應立處又一鞠躬畢使捧國書致洋語繙譯以華語譯之畢使捧國書向前至納陛中階下慶邸由左階下迎接國書轉陳御座前黃案上畢使再一鞠躬

皇上點頭答之使臣退回柱間原立處

皇上溫語宣慰使臣繙譯將出殿復向上一鞠躬然後次第而出當是時殿內外王公侍衛官員凡百執事擁衛排班靜穆無聲及與使退出昭景門
皇上啟鑾還畫舫齋

二十一日記

光緒丙子自滬上之天后宮起至吳淞四十里間有洋商價買基地造鐵路行火車但搭客而不載貨每日開車往返凡次上等車價來回一員旋由中國給價銀二十六萬兩買回拆毀然其舊址尙在也今日風氣大開廷議已准造鐵路似莫如用新式之高腳鐵路較爲費省工速此路創於英國拉爾提格廠其在滬總辦者則總兵銜權授中國副將麥士尼爲能也路如人字形以鋼條安置地上占地無多車腳等係純鋼製成尤妙在單條行駛較之雙條穩而且速卽有房屋墳墓河水橋梁以有高腳之故易於避讓路之高低不等或離地三

五尺至二丈有餘爲止。其行駛用煤火力電氣力皆可。其價每一英里離地四尺者需英金八百五十鎊。其鐵路之斤兩每一里重英權七十五噸。腳愈高則價銀斤兩亦大而重。總之較雙條者約省費一半。若淞滬再造此路。祇十餘萬金足矣。近聞英俄德法等國以其價廉物美相繼而造者已數千里矣。鄂省沿江一帶已拿獲會匪著名大頭目李典、葉坤、山高、德華、楊清和、濮雲亭、陳花魁、李紫榮等正法。

二十二日記

是日爲長至日。謹率參隨等員望

闕叩頭遙賀。查光緒九年英國造冊。本國男女共二千六百萬人。瑞典四兆五十七萬有奇。俄國八十二兆四十餘萬。法國三十七兆二十餘萬。德國四十五兆三十七萬。日本三十六兆七十餘萬。中國約四百兆。

二十三日記

輪舟往來天津。因北河日淺。難到碼頭。或云碼頭恐將移於唐沽。則紫竹林必寂寥矣。若以開平鐵路接至唐沽。其勢甚易。則煤之銷運亦必加廣。唐沽距大沽口僅八里。去紫竹林二百餘里。陸路亦有百餘里。北河水勢日淺。又有沙埂以阻之。近來唐沽之地價漸昂。蓋有逆

料碼頭將移此者。故皆購地以謀獲利也。明季西人之首至京師者。葡萄牙則有陽瑪瑯。日耳曼則有鄧玉函。義大利則有熊三拔。而英法無聞焉。萬曆二十四年。英女主欲修好中國。遣使具書幣。駕巨艦。途遇颶風而沒。事遂寢。崇禎十年。有舟師率貨船五艘。由蘇門答臘至澳門。葡人阻之。又至虎門。具道通商意。復爲葡人在粵者所沮。故明史謂有洋船四艘。由虎跳門。薄廣州而西。而西人馬利遜約史略亦謂英來通商。始明萬曆間。蓋本諸此。

國朝康熙二十二年。旣平臺灣。英人頗通市於浙粵焉。

明史南洋有滿刺加者。法人欲開通市埠。據而有之。東
行入澳門。粵東等處。正德十三年。遣使來貢。請封。詔給
其方物之值而遣之。久留不去。十六年。又攜土物求市。
復拒之。萬厯初。巡撫林富陳許佛郎西互市四利。部議
從之。遂得入香山澳爲市。又越境商於閩。往來不絕。二
十六年。巡撫朱執嚴海禁。其人無所利。遂內犯漳州之
日港。梧嶼。副使喬柯等禦之。執被劾。而海禁復除。法人
益逞。遂於香山澳築城臺以自固。

二十四日記

美國各礦所出之銅。年多一年。去年共有二萬七千八

百六十一萬磅。較前年多三千三百零三萬四千磅。此皆由公司開採者也。至出口之銅。去年值洋銀八百五十四萬八千餘員。前年值洋銀九百八十六萬七千餘員。美國自改用無煙火藥。歐洲各國之向業火藥者。相顧失色。此藥屢經試驗。異於尋常火藥。蓋無煙無氣。而火力又久。并無渣滓。且可久存不壞也。

二十五日記

華人願往墨西哥國開墾者。墾人永免田賦。遂有華人挾貲至墨南境。招徠彼處華農。設法開闢新疆。耶穌一教。分門別類。所行規矩。亦各不同。有所謂洗禮會者。

十年前自英來華。不過數人。經費祇英金二千鎊。今則接踵至者二十餘人。費用亦數倍於前矣。印度去年出煤之數。共有二百四十五萬三千五百餘噸。統計英國商船。現有帆船五千六百六十八艘。輪船六千四百零三艘。

二十六日記

今暹羅國王年三十八。在暹人中已稱魁梧。其才德亦較前王爲優。通國賦稅。歲得英金二百萬鎊。又有雜稅等項。約百萬鎊。惟用款無多。除支銷外。稍有盈餘。通國人約十兆。而華人居其半。他籍人亦皆有之。國內敝俗

甚多。必須設法革除。方能振興國勢。

二十七日記

法京巴黎隸於賽納府。有獄十所。其八在城中。其二在城外。城之東南蒲爾瓦提特羅大街。有獄曰伯列藏麻。案在焉。伯列藏。譯言獄。麻。塞其名也。余與慶靄堂張護三王省三往觀。先期函告總辦。車行三十分鐘。入門。總辦導觀各處。屋瓦牆堅。內外兩重。中隔複道。外施鐵門。有兵守之。其中爲巷六條。每巷樓三層。每層有房七十間。其房約寬六七尺。長一丈二三尺。有教士講經之臺。適居全獄中間。而六巷之首。環列臺外。每七日。教士喑

經則開巷門使獄囚得聽焉先觀監禁之所爲犯者初捕尙未定罪之獄捕入時必令浴身更衣不許攜帶鐵器各物迺審其身貌書之冊並照相留之又重犯之獄爲一巷拐騙劫盜姦殺皆有之各居一室而不作工有三犯居一室者蓋通同爲惡又恐其自盡也有瘋癲者恐其害人也又輕罪之獄爲一巷作工皆有常程不令得暇粗工細工粗細兼半之工各視其所長而派之工作之貴悉歸本犯不充公款俾自購食物甚有積貲者各巷盡處皆有黑獄凡重犯違禁而多事者輕犯怠於工作者入之惟日給膳夜不給燭或數時或數日鮮滿

七日者各犯日凡三餐有麪包每七日與肉食二次每次牛肉約一斤有半房中有窗戶牀衾廁所及一小桌門外有鎖有洞以遞飲食而便監視每日必令出步片時以得天氣地下窟室熾炭以送暖而禦寒雖屆冬令而巷中甚溫此獄每冬炭費三萬佛郎有藥室有病房以待病者有書庫以待各犯之願觀書者凡各學諸藝以及遊歷教門之書無不有之亦使之散悶且警覺改悔也有犯者親友相見之所隔以鐵欄鐵網犯者坐內親友坐外可以對談仍有官以監之廚房在大門之內獄房之外卽以罪犯執其役所具飲饌甚精蓋罪犯除

官給日食之外如做工有餘貲或素豐於財皆可在此
買飯也法國律例亦有斬決一歲中犯殊死刑者無幾
人次則流荒島作苦工次則監禁自數日數月數年以
至終身不等凡罪犯由此移徙始以鐵索繫手牽之其
在獄中則行坐自若並無拘攣也

二十八日記

土耳其爲突厥之轉音蓋本突厥遺種也歐洲好古之
人有掘得古碑者讀其文爲番漢合璧一邊漢文係唐
初某年册封突厥之文文用駢體番文本不可識然依
唐文讀之知爲突厥文後復搜求舊籍連得古碑有番

漢合璧者。有專刻突厥文者。輾轉尋繹。攷究益博。遂解
徹突厥字體。於是知今之土耳其文。實以突厥文爲根
源。而詳考土耳其之先。乃突厥之苗裔也。又有掘得古
碑者。一邊亦係漢文。觀其年號。知爲西漢時物。文氣古
茂。確係西漢之文。一邊文不可辨。似與蒙古文相近。可
決爲匈奴之文。惜尙未得佐證。將俟蒐訪云。夫匈奴突
厥。皆極強盛。斷無無文字之理。史冊失於紀載。乃一二
千年後。攷古之士。能求得之。亦奇矣。西人攷得回紇亦
有文字。與土耳其
相近。突厥也。回紇也。土耳其也。文字雖有異同。而出
一源。大抵由突厥變爲回紇。由回紇變爲土耳其也。

二十九日記

俄屬西伯里亞卽鮮卑之轉音。鮮卑在東漢時已強盛。其國勢不過稍亞於匈奴。其種族亦甚繁熾。流入中國者。迄於南北朝時。數百年不絕。自唐以後。日就衰微。漸徙而北。去塞絕遠。中國遂不復知有鮮卑矣。後爲蒙古所逼。益徙而北。立國於今之西伯里亞境內。以其地荒寒。得以久存。迨俄羅斯旣滅。其境內之蒙古。遂逾烏拉嶺。闢地而東。至明中葉。始滅鮮卑。今尙有鮮卑故城。俄音謂之西伯里亞。遂建西伯里亞省於此。西伯里亞省所採之金。自西歷一千八百三十四年至八十七年。凡五十四年中。計得二千九百八十二萬五千兩。其黑

龍江及太平洋沿岸產金。尙不在內。又一千八百八十八年。探得二十萬三千兩。八十九年。探得二十四萬二千兩。合之前五十四年中所得之金。已值英金一萬二千萬鎊。

三十日記

地震山地中之火鬱久而發。與火山炸烈。同一飛災。殆非人力所能挽回。蓋五行之形質。如水土金木。無不流露於人間。而火係最發揚者。乃獨依物以呈形。草木有火。金石有火。膏脂有火。而不有以引之。則盈天地間。又不見有火。然火若必依物而見。則火當寄於各物之中。

不必列於五行矣。今既列於五行，則必如水土木金各有歸宿之所。天壤間既無處可以藏火，則必藏於地下無疑。火性炎上，久鬱於地，難免發揚震動。考之易，一陽居於二陰之下，其卦爲震，蓋陽氣必升，以二陰而抑一陽，雷之所以震驚百里也。地震之道亦猶是也。

十二月辛卯朔記

今英屬印度之境，計八十三萬一千九百六十三英方里。居民一百八十四兆。歲入之款五十兆鎊。戍兵十八萬七千人。土王所轄之境，計五十六萬五千一百有六英方里。居民四十八兆。歲入之款十五兆鎊。兵丁三十

一萬五千人。礮五千三百尊。土王軍內所用火藥彈子。士乃得槍後門礮。有開廠自造者。所練之兵亦饒精銳。印民納稅貢金於土王。較之直隸於英者更形踴躍。俄屬中亞細亞商務日興。英於中亞細亞亦有屬疆。僅能與之爭利。無如轉運之路必出俄疆。俄之稅於本國取百之二五。於英商取百之四十。復禁印度英茶售於俄境。防範嚴矣。

初二日記

日本有人類社會者。不知始於何時。曾著一說。名曰人類社會變遷說。茲摘其大略云。地球非不大也。而陸地

面積不過八百六十四萬七千六百七十日本方里邦

國非不多也然統計亞細亞洲有中國日本朝鮮暹羅

及俄屬之西伯里亞法屬之越南英屬之緬甸印度俄

屬之吐克斯坦恩即圖爾又有亞業加坦內有屬俄者皮路

直坦即俾路芝土耳其阿喇伯波斯內有屬俄者共十四國

所云十四國者蓋以圖爾齊而其自立之國惟中國日

本暹羅波斯而已此外皆服屬於歐洲諸國者也阿非

利加洲之埃及土耳其半屬國也其全洲之海岸則為

法英德比葡諸國所據其內地有為未闢之野番者有

分裂為小部亦不能成其為邦而聽命於西人者其餘

膏腴之地。則並爲西人所墾闢。分屬諸國。四周海岸土地皆歐人行主權之地也。亞細亞洲以南。南洋諸大島。如新金山。婆羅洲。噶羅巴。呂宋。蘇門答臘等。及大小羣島二十有四。則皆爲英吉利。荷蘭。西班牙三國所占。歐羅巴洲有英。法。俄。德。奧。義。瑞。士。瑞典。希臘。土耳其。比利時。荷蘭。丹馬。西班牙。葡萄牙。羅馬尼亞。塞爾非亞。布加利亞。共十八國。除羅塞布三國外。皆儼然獨立之國也。亞美利加一洲。本爲歐洲人所開闢。分南北中三大部。以美國爲最大。大抵非歐人之子孫。卽歐人之屬地。得行其主權者也。所有土人。僅成小部落。依棲各處而已。

然則今之地球雖有大小八十餘邦。合德屬之日耳曼二十六國等在內非歐人子孫。卽其屬地。其能自立者僅六七國。其面積不過一百萬日本方里耳。吁。此世界其終爲高加索人所領歟。如以阿伯亞人。巫來由人。亞美利加之銅色人。自古不能自建邦國。今猶蒙昧蠻野。故爲高加索人所領。至蒙古一種。其勢向甚強大。成吉思汗幾統一亞洲全部。且侵略歐洲之大半。有一統世界之志。無如墳土未乾。外藩先喪。卒亡其國。若高加索人。則風氣已開。各國皆同。實有根之木。有源之水也。今者朝鮮爲西人香餌。勢將歸俄保護。臺灣被逼於法。支那之四周已在高

加索人重圍中矣。日本則東洋一孤島。而薩格連全島。前被俄人侵奪。小笠原屬島亦將爲西人所占。豈可不寒心耶。我三千有餘萬兄弟。其奈此國家何。其奈此世界何。是日爲西洋元旦。各國公使例集王宮致賀。余於未初一刻。率慶常吳宗濂潘承烈世增至王宮。俟頭二三等公使齊集。排班立定。法總統率宰相各部大臣出而相見點頭。總統立於中間。各公使致賀年頌詞。由教王公使讀畢。教王公使向爲頭等公使之首。總統亦宣讀答詞畢。乃走至各使前。每人寒暄數語。握手致殷勤。宰相各部大臣亦以次與各使相握手。然後各使向總統點頭而出。

總統仍握手送之。頌辭云：今值履端伊始，本公使等敬來祝賀。願

大法國興隆日臻。

大總統福祉康泰，祈天永命。遐邇臚歡，謹以爲頌。答詞云：承各國公使大臣吉語祝頌，具見邦交之篤，欣感交加。今值改歲，願各國共享昇平，俾得盡心於國計民生之事。我國一切權利，雖無所變更，而交際之道，以和爲貴，應與各國共勉爲之。并請轉達各國國家，以表和好之意，有厚望焉。

初三日記

日本一國火山甚多時有發揚迸裂之虞每當火山轟炸地維卽爲之震動當地震時有某員之妻出門觀望候而坤輿拆裂陷入隙中其女趨出欲救其母復陷入焉於是塵土飛揚遮蔽天日越數日工人掘挖所傾之屋微聞窟中有聲啟而出之卽前被生埋之母女二人也絕去水粒七日不死亦異矣有一山左右俱聳高峰內有三穴闊約六十尺若由穴口拋擲石子必閱數點鐘其聲始寂則其深可知迨未震前一日此穴鎮日有聲隱隱如雷之響震時右峰崩倒空中沙飛塵捲滾滾如煙霧之迷離更有幾處山尖盡削其髻亦有變更形

狀低者忽而軒昂高者忽見平坦亦有基址移往別處者樓臺屋宇道路橋梁傾圯遷徙者不可指數有一河平日淤淺今則急流如箭又有一山甚高山頂神廟一所今皆沈沒居民於十日前目擊山頂浮露青雲終日瀑泉飛瀉云

初四日記

海軍衙門本假煤渣胡同神機營後院以資辦公前經醇賢親王擇購西四牌樓粉子胡同奕將軍宅擬建海部京廨迄未開工近甫由慶邸飭移衙門於此將原屋拆去改建署門大堂二堂各股公廨及檔房庫房日

本有一河名基蘇。當地未震之前。河底俱屬沙屑。全無石粒攪混。既震之後。多有石塊。且有一石鉅如小屋。浮於河面。并有汙濁之水。由河底之孔湧出云。

初六日記

電學有無窮之妙。其大用不外四端。一曰治病。五百年前。羅馬人有用以治癱症者。今則所能治之病更多。如溺水。夢魘。酒醉。懸梁爲時不久者。頭疼。牙痛。筋痛。肉麻者。皆有奇效。此法實有三益。一能運行筋脈。感動精神。二可在細管催水。隨血絡運行。以通脈汗。三如病在一臂。一股。用電氣急治。不必按方服藥。以免全體胥受藥。

力。一曰傳報。電路以銅絲或鐵綫爲之。惟鐵綫一杪內
僅行二萬洋里。而銅絲一杪能行二十八萬洋里。較光
行尤速。一曰傳聲。西人貝拉所造。曰傳聲器。一名德律
風。造法用吸鐵桿。圍以包絲細銅絲圈。裝於木殼內。接
以遠處之電綫。吸鐵桿前端有極薄圓鐵皮。人口對此
鐵皮言語。彼端亦有此同式之器。人耳對此鐵皮聽之。
卽聞言語。一曰燃火。地雷水雷多可用電氣放之。其法
將火藥裝於鐵殼內。或沈水底。或埋地中。以銅絲爲電
路。復以細鋼絲或鉛絲接於二銅絲之中。以通火藥。可
轟敵於數里之外。以上四端皆實用之。載在電學書者。

也。此外用以鍍金，可飾器皿，用以代炬，可照昏宵，用以運機，可助工藝，用以航海，可得南針，信乎格致之學之精妙也。

初七日記

西報朝鮮永清海灣有一埠名刺沙利輔者，頗爲洋人所注意。法水師提督率艦往遊，而英水師提督亦往駐焉。因此灣冬季無冰，與俄之瑯春相若也。廣東南海廟有二銅鼓，大小各一，大者徑五尺，唐時高州太守林靄得之於土酋，以獻節度使鄭綱，納於廟中，其製中空，無底，腰束而臍隱起，旁有兩耳，通體作絡索連錢及水

穀紋其色微青如鋪翠銅質欲化金精獨存蓋千數百年物也其邊際舊有蛙六今已無存小者徑四尺出潯洲銅鼓灘先是灘水湍急作銅聲一日水涸銅鼓見太守取之懸於四面樓鼓邊有金蝦蟆五被人竊去後歸廟中其色純綠作鷓鴣斑斜紋纖麗隱然作八卦象每歲二月十三日祝融誕辰粵人擊一鼓以娛神其聲鏗鏘鏗鏘宛若雷行於天近聞聲小遠聞聲大鼓內均鑄有漢伏波將軍鑄字樣蓋征交趾時所遺也說者謂三代銅器用陰識其字凹秦漢用陽識其字凸陽識易成陰識難鑄此爲漢物無疑矣或又謂南方卑溼革鼓多

不能鳴。故以銅爲之。凡爲鼓。紅銅爲上。黃銅次之。其發聲在於臍上。今粵中銅鼓。師僅有數人。蓋其挾術甚秘。不傳於人。僅傳於子。故漸稀矣。

初八日記

今地球大勢。頗似春秋之後。戰國之初。俄羅斯以一面制三而。諸國畏之。忌之。如六國之擯秦。而俄之日趨強盛。頗如秦獻公孝公之時。英之國勢。與俄相匹。而富強過之。殆猶楚宣王威王之時。初併吳越。地廣人眾。而衰微尙未見也。法蘭西本霸國之餘。拿破崙第三其猶齊閔王乎。德意志用賢才以勃興。地不甚大。而國勢可抗。

英俄殆猶趙之幾與秦楚相匹乎。美國僻處一洲。自開疆土。亦猶燕之僻在一隅。而戰爭之禍較寡焉。奧斯馬加意大利四戰之國。猶韓魏也。中國尙文德而不競武力。頗有宗周氣象。然猶似在春秋之前。非若戰國二周之弱小也。土耳其處兩大洲之中。爲英俄法所窺伺。孰先得之。皆足以廣地而張國勢。恐不免如戰國之宋。爲齊楚魏所分裂也。日本國雖小。常有與諸國頡頏之意。其猶中山乎。其餘諸國。殆如泗上十二諸侯焉耳。嗚呼。天下事有始必有終。今之形勢。吾不能測其所終極。儻有如佛經所謂金輪聖王者出乎。當在一千年以內。未

可知也

初九日記

俾路芝東界爲印度西之英國新省地北界阿富汗南
界海西界波斯全境自東而西約九百啟羅邁當自南
而北約五百啟羅邁當在巴黎東五十五度至六十七
度北緯二十五度至二十度零半分境內高低不一低
下之地多在臨海高敞之地多係內地形勢與阿富汗
相似極高之地距海面有二千邁當地氣迥殊窪地與
印度熱地相同高地與歐西涼地相同近西沙漠地極
荒瘠物產稀少偏東稍有出產草木豐茂民奉回教民

類約分二種。其一土著。稱爲白拉烏衣。多居東境。一爲波斯阿喇伯分來之人。多居西境。獸有獅豹虎狼山貓野狗狐狸山羊野驢猴鳥有鷹雕雁。海岸魚極繁。瀕海之民。多以捕魚爲生業。

十六日記

西人天文格致之學。不外測算。如勾股和較方圓。以至於弧角八綫。渾圓橢圓平綫拋物綫等。各有定法。不失毫釐。近來製造一器一物。必測準分度。詳列表數。如開花礮彈。平常重九磅者。內藏藥九兩五錢。重十三磅者。內藏藥十兩。重十六磅者。內藏藥十八兩。其新式劫海

奴開恩兩種開花礮彈。測量遠近。更爲精密。卽炸藥配準質料。計其能力。炸彈中藏有時引藥一種。每燃一英寸。歷時七秒半。綫盡藥發。適當其可。又如光學中折射光行速率。積累而計。百不失一。要非精於測算。不爲功。邇來福州織布局。共有六十餘所。惟所用之紗。尙須購自外洋。利源外溢。現購紡紗機器。十月間已到閩垣。不日將擇地建廠。又南台三山會館布行中人會議。謂閩省每年除洋布外。銷售蘇松機布。約三百五十萬捆。自卞制軍會同陳紳寶琛興創機器織布局以來。福州本布出產。約有一百萬筒。此爲民興利之大者也。

十八日記

加那大共有華民九千數百人其六千皆係爲商其三
千則往來無定者也。滬報云戶部將常年入款逐細
核計每歲各省海關所徵洋稅銀一千五百餘萬兩地
丁銀一千餘萬兩鹽課釐等銀一千二百餘萬兩常關
稅銀三百餘萬兩釐金銀一千三百餘萬兩茶稅當稅
鹽商捐輸等銀三百五十餘萬兩各省雜稅銀一千五
百餘萬兩裁撤長夫等銀五十三萬餘兩合計約八千
數百萬兩余謂此帳與余平日所聞大約尙無甚出入
惟雜稅銀一千五百餘萬兩一款似有訛舛而洋藥釐

金八百餘萬兩。則漏未敘入云。

十九日記

土耳其之君士但丁海峽。爲歐亞兩洲中道。可以出黑海而入歐洲。西歷一千八百四十一年。英德法奧義五大國暨土耳其定約。凡兵艦均不准過此海。若必不得已而過。須將所因何故。向土廷報聞。求取憑照。始能過境。商船往來。亦須報明地方官。其平時管鑰之司。則土耳其任之。迨一千八百七十一年。復在倫敦酌議。七十八年。俄土戰罷。又在百靈其議。今年俄船不向土廷請照。突將戰船載兵駛過。各報咸謂俄欲故挑土釁也。

英皇長孫初定明年正月二十六日成婚。此人當繼君位。各國擬派頭等公使致賀。余電達總理衙門。十二日總署來電云。齊電已進呈。卽由貴大臣赴外部恭代致賀。毋庸辦給。

國書旋聞皇孫於十四日病故。蓋邇來倫敦疫氣甚重。余又電達總理衙門。十八日衙門來電云。本日奉旨。薛福成電已悉。卽著該大臣赴外部遵

旨致唁。欽此。余已於十七日發一洋文電致英外部。申弔唁之意。今日復發洋文電云。本大臣接奉本國

國家電諭。

大清國

大皇帝聞

貴國主長孫克蘭斯侯薨逝悼惜殊深卽令電達

貴國大君主并大太子及大太子妃以申弔唁之情而
示休戚相關之意本大臣奉此卽請貴大臣奏明
貴國大君主爲禱

二十日記

中國刻書由來已久五代會要後唐長興三年卽西歷
九百三十三年命太子賓客馬縉等充詳勘九經官於
諸選人中召能書者寫付匠雕刻每日五紙漢隱帝乾

祐中周禮儀禮公羊穀梁四經皆已鏤版。後周廣順三年，尚書左丞田敏進印板九經。據是則中國刻板印書，在西人前五百餘年矣。西人印書喜用活板，創其製者，德人瞿登倍也。其法鑄鉛爲短條，約半寸許，薄且窄，一端刻一字，依文彙字序，併合成板，四周圍銅片緊束之，置諸機上，塗以墨，以紙覆之，重壓其上，揭其紙，已印文字，朗若列眉。其始行於靈納城，繼行於斯德辣步城，日耳曼各方爭相倣效。羅馬初用其法，在一千四百六十七年。又三年，巴黎行之。又三年，倫敦行之。俄人仿行在一千五百五十三年。自是愈傳愈廣，至今不過四百餘

年前此恆用寫本則西人實師華法也華書刻板在西人前五百餘年惟西人初創遽用活板而中國則始用鑄板後用活板活板起於宋大約在西歷千一百年活板之字宋人用泥明人用木

國初又用銅鉛逼肖西法祇印機爲西人獨倡邇來中國亦多用之大抵木板與活板各有利弊不相掩也

二十四日記

馬格里來信云昨遵總署來電赴外部問滇緬界事曾發電戒飭管理緬甸大臣否外部答云英兵未曾實入中國邊界總署亦未指明英兵所在地名是以印度部

不能發電等語。總署來電僅言騰越西北地方。騰越西北無論何處。皆係穆雷江之北。本非緬甸所轄。英雖戰勝緬甸。此地不歸英屬。昔曾侯已明告外部。今中國若不欲失管轄之權。此地即穆雷江之北。厄勒瓦諦江之東。現在必須竭力索問。此處即出翡翠之地。雖非盡中國人。卻皆中國一類之人。風俗教化衣服。皆與中國同。中國可云向歸我轄。現仍欲管轄下去。必能有效。從前中國四面皆有屬地。今則俄在北邊。既割黑龍江大股之地。又欲覬覦喀什噶爾之西。朝鮮已爲自主之國。日本滅琉球。英人踞緬甸。法人取越南。暹羅不肯再進貢中國。中國所有屬

地僅餘西藏而已。非中國之不能管轄各地。實由中國於邊界之事。太不加意。甚可詫也。

二十五日記

八月十六日。字林報云。致遠輪船由香港到滬。被海關查出軍裝。實係鎮江洋關寫字梅生所運。由香港裝船出口。共有三十五箱。詭稱鋼條。尚未露出破綻。其時德臣西字報已有風聞。由香港電達滬關。及致遠抵滬。起出快槍百桿。彈萬顆。對面笑五十桿。彈五千顆。洋槍五十桿。彈萬顆。另有炸藥約二十五磅。在梅生行李中。梅生由滬回鎮。經官拘獲。置之英國來的茂克兵船上。又

以三輪船押解抵滬。禁之滬關。凌風小輪船中。

二十七日記

西人精研汽學化學電學。以得御水御火御風御電之法。而一切製造。遂能極人巧而奪天工。余嘗問西士。將來尙能得御雲之法乎。西士云。雲於天地間最無力。不過乘風氣以飛揚。恐不能得其用也。大抵水火風電。其力皆甚大。西人窺其奧妙。驅而用之。無不如志。遂致富強。若雲氣之出自山川。雖能頃刻布濩。彌滿天地。不過藉風以行耳。蓋雲本自無力。則其不能致用也亦宜。

二十九日記

字林西報云北京西友來信恭聞

皇上神聖英武萬幾餘暇典學不倦現欲通英國語言文字侍讀者爲同文館中之兩教習云 中國自蔡倫作紙之後繼起者爭奇競勝美其名曰蠶繭曰烏絲或以松花爲之或以栲皮擣就然皆以竹素爲盛類能欺霜浣玉滑澤晶瑩格物可謂精矣近日歐洲新法更能用破布敗絮及鳥毛魚皮獸皮等製紙質堅價賤卽起蔡倫於此時亦覺後來居上今又有美國人以麥心之皮製紙光滑耐久其化學之功更妙矣格致之學苟精殆可使天下無棄物歟

三十日記

中國已開之礦。開平煤有九層可開。現祇開五層。煤質之佳。甲於各處。南北洋兵輪大半用之。視洋煤尤勝。近又開出佳泥一種。可供塗修鍋爐之用。基隆之煤。火力甚猛。可合輪船之用。以上二處皆有鐵路。以便運出海。口。濰縣煤質頗佳。開出者日以噸計。惟不用機器。距海口甚遠。又無鐵路。僅供周圍百里之用。積煤甚多。銷路甚緩。入夏遂停開挖。淄川之鉛。所出亦饒。可中礮彈之用。近連滬局鎔鍊。其用不亞洋鉛。而價則較廉。雲南銅錫諸礦。日見起色。京銅不但無欠解。并可豫解。箇舊之

錫運至上海雖不甚多。而漢口則銷用甚廣。徐州利國之鐵礦產雖美。限於資本。未能大舉。漠河金礦如照舊章所獲。必可如前。貴州青溪鐵礦。僅開小鑪。尙未能開。大鑪。聞因布置未善。運路寫遠。恐亦將以款絀停止。殊可惜也。惟滬局開鑪鍊鋼。極爲得法。前時試鍊所開者小鑪也。而所鍊之鋼。與外洋無異。價又廉於洋鋼。故近日大開鑪火。決計自鍊。可勿需洋鋼矣。

光緒十八年壬辰正月辛酉朔記

余在巴黎適值天氣清明。格外和煦。午後駕輕車。赴大樹林駛行。觀覽而回。婆羅洲爲亞細亞羣島之至大。

者正在赤道之下。自赤道北七度六分起。至赤道南四度十一分止。京師東二度五十二分二秒起。至西七度二十九分十八秒止。巴黎東一百六度三十八分起至一百十七度止。合附近小島。共得七十四萬八千七百啟羅邁當方里。較之法國之地。蓋半倍之。西界中國海。北界蘇祿海。過此卽呂宋羣島。東界望加錫海峽。過此卽西里百島。南界爪哇海。過此卽爪哇島。其地北境。今屬英國。東西南沿海各地。皆屬荷蘭。或歸保護。內地尙有土番部落。有人所未至者。地溼多雨。南境尤窪。北境稍高。居民皆處海岸。縛木水上。築室以居。島中有大山。自東北而西南。劃分界。

限土番稱爲一千一百嶺。卽志略息力大山也。明史封
淳泥國後山爲長甯鎮國之山。當卽指此。其江河在淳
泥者曰淳泥江。在東北岸者曰慶那伯當岡。此北般鳥
薩巴之河。在西北岸者曰沙拉窪克。此西般鳥沙拉窪
之河。在南岸者曰班熱馬生。此馬神之河。曰達亞哥。此
戴燕之河。在西岸者曰馬當。曰邦的亞那。在東岸者曰
哥的。曰巴昔爾。皆河之大者也。天氣漸熱。不能養人。頗
海寒暑表二十七度至三十二度。法國表度

初二日記

婆羅洲在唐曰婆羅。

唐書南蠻傳

在宋曰勃泥。

宋史外國傳雖據

全島而言其實古婆羅國卽今埔尼國

外國史略

祇有北岸

之地古大今削固尙存也在明曰婆羅曰淳泥不知其

爲島之北境一國曰文郎馬神卽今班熱馬生

製造局圖

在島之南境洋文譯音則稱般鳥或稱慕娘土人自稱

蟠尼阿蓋皆婆羅勃泥一聲之轉耳自唐迄明土番分

部而治或奉佛教或奉回教其大者朝貢中國明正德

十六年葡萄牙人墨瓦蠟始至淳泥後西班牙人亦至

焉然未據其地也萬厯三十七年荷蘭始至西岸由是

而南而東或踞其土或奪其權浸削浸滅瀕海之地皆

爲所有昔日諸部土酋今皆歸荷蘭保護道光二十六

年遂定爲荷蘭屬部。今所稱東西南般島皆是也。嶺之北岸則東爲薩巴。今屬英。卽所稱北般島。西爲沙拉達。克今屬英。亦稱西般島。其中埔尼國卽古淳泥。已歸英保護。爲屬部焉。內地多載燕人。沿海多巫來由人。華人則處處有之。凡開礦經商種植諸事。皆賴以辦。亦已漸入漸深。然島中大半榛莽未盡闢也。

初四日記

去年美國編造丁冊。民間產業其值洋銀六萬二千五百兆員。此合十三兆戶之民生計言之也。內十三萬五千戶。每戶每年有利十八萬六千員。又教會中人四百

戶每戶每年除動用外淨存餘利五十萬員又八千戶
每戶每歲有二萬五千員又十萬戶每戶每歲有十萬
員其合每年一千四百兆員可知美境民產之富 淳
泥國或作埔尼亦稱文萊通中國最早全島亦蒙是名
城在赤道北四度四分京師西一度三十分倫敦東一
百十四度
五十分唐之婆羅宋之淳泥世居於此號爲大國至明則
東奪於蘇祿西侵於荷蘭近日東西兩境皆屬英國益
復不振城瀕淳泥江江寬二啟羅邁當兩岸有小河穿
城而過此城當明嘉靖間居民約十六萬人今祇有一
萬人矣

初五日記

薩巴卽英之北般鳥

譯音卽勃里約次諾斯般鳥

在婆羅洲東北自

赤道北三度五十二分古拉山起至七度二分三十秒
桑邦忙休角止京師西一度八分至東二度四十六分
止共得七萬八千九百四十八啟羅邁當方里疆域之
廣過於錫蘭居民踰二十萬其地斗出海口踞全島形
勢西界淳泥南界荷蘭屬部西北瀕中國海東北瀕蘇
祿海及曼陀羅海昔時薩巴之地分屬蘇祿淳泥乾隆
二十七年英人始至其地同治年間英商丁地始租地
爲公司光緒三年復租其北三省之地於淳泥王歲給

洋銀一萬五千員。未幾奧領事復將所轄之地售與丁地。遂號爲北般烏公司。全有薩巴之地。時光緒七年也。於是稟請英廷保護。開埠通商。派官監理。分爲九省。卽以管理之人名之。曰阿爾哥克。曰嘎力夫。曰丁地。曰答烏魯斯。曰哀勒非斯。多納。曰幾貝爾。曰麻爾丹。曰美居爾。日。設一總督統轄之。本地餉項。卽由地稅人稅煙酒稅抽收。進口貨如米穀布匹機器銅鐵器煤油鴉片各種酒及水之屬。出口貨如屋料船料諸木沙藤樹膠藤黃胡椒雪茄煙燕窩淡菜之屬。開礦淘金獲利已多。光緒十四年。進口貨值洋銀一百三十萬員。出口貨值五

十二萬員稅餉贏餘四十萬員。礦產有石煤金沙。已由華人設立公司開采。又有銅鐵錫礦。有金剛鑽水銀。有鹽泉。有鐵木楠木。潮腦冰片。山打根城爲北般島之都。會瀕海依山。英人所新建也。在赤道北五度五十分二十二秒。京師東一度三十九分。貿易種植權利俱屬之。華人土番有戴燕人武喫人。種類不一。而巫來由人爲最多。

初六日記

王夔石制軍來信云。滇省西南邊防。以騰越龍陵爲門戶。騰越龍陵。又以緬甸爲藩籬。自英人襲緬。藩籬撤而

門戶寒矣。新街本卽蠻暮舊土司之地。乾隆間曾
頒給宣撫司印。至今尙存。騰越廳庫自騰赴緬路凡九
條。皆總匯於新街。故新街爲騰越之鎖鑰。曾惠敏欲索
回此地。誠爲卓見。然新街據大金沙江上游。猶長江之
有武漢。且自緬都赴孟。供玉石廠必出此道。乃咽喉形
勝之地。英人未必肯還也。老八募俗稱蠻弄。卽野人山
之西口。山中現有一軍。以保護商駝爲名。時至其地。惟
野人山綫互南北。自大路九條外。小徑叢出。議者頗病
其防不勝防。如能收回老八募邊防亦屬有益。至擇人
乃緬屬通稱。其實中國之耿馬車里孟連等土司外不

華不緬之野人亦正不少大約以狽狽葫蘆國爲最著
在順甯思茅普洱以外居潞江瀾滄江之間潞江以東
歸我一說亦祇能就永昌所屬之孟定土司以南而言
若孟定以北則龍陵騰越兩廳已在潞西矣目下英雖
派員查勘而尙未駐兵南掌本入貢之國與普洱爲鄰
何時屬於暹羅尙未考究得實也

初七日記

散維齒羣島亦稱山域治埃蘭山域治蓋散維齒之轉
音埃蘭譯卽羣島製造局圖作散泰西謂檀香爲散維
齒此島產檀香甚多因以得名或稱哈歪伊羣島志略作阿

孟在北太平洋之中。自赤道北十九度起。至二十二度
十九分止。京師東八十三度十一分起。至八十八度四
十三分止。由東南而西北。錯列斜上。凡十三島。一作十五島
而有居民者。僅八島。以夏威夷。即哈伊為最大。以阿亞湖
一作瓦湖為最要。其會城王居及通商口岸。曰賀挪魯魯。章約
一作漢拿即在瓦湖島中。其介乎夏威夷瓦湖之間者。曰
麻維毛。一作伊曰麻拉開。一作摩曰賴恩拿。一作拉曰開特
老。一作威在瓦湖西北者。曰高哀。一作考曰納訶。其六千
五百八十七英方里。乾隆間。英人可克始行船至此。每
島各有土酋。不相統屬。土番共有四十萬人。後傳教者

踵至嘉慶末建耶穌教堂道光二十四年羣島合爲一國以賀挪魯魯爲都城其酋爲其主自歐美人來者日多而土酋衰減日甚咸豐後華人又麇至光緒十四年總册羣島居民共八萬六千六百餘人內華人二萬二千九百九十七歐美人一萬九千六百餘較之二十五年前華民多至二十倍而土民祇有昔日十分之一土田肥沃氣候溫和寒暑表自六十度至八十八度英國表度洋海微風間以小雨足以養人高原產麥最佳低地產棉花桑蔗煙葉甘薯大芋椰子加非山中旃檀極繁因砍伐太甚今漸稀少畜多綿羊亦有牛馬豬雞西距香

港五千二百八十海里。東距舊金山二千一百二十海里。師船表邊數理精蘊推得一海里爲中國三里又一百二十步。蓋依西法以六十海里當赤道一度也。去年檀香山稽查戶口。土人共三萬一千五百有奇。野人六千。哈歪伊人而爲外國父母所產者七千五百。美人二千。德人千二百。英人二千。葡人九千。華人一萬五千。日人一萬三千。別國人一千三百。

初八日記

近年檀香山國歲入稅餉。約英金五十七萬二千五百鎊。歲出經費八十七萬八千八百鎊。國債五十一萬九千九百鎊。進口貨值英金一百零八萬七千七百餘鎊。

出口貨值二百八十萬七千七百餘鎊。夏威夷島蓋火山土石迸聚而成。其山峰之高。火燄之奇。爲地球之冠。今尙出火者。其山曰麻拿洛哀。曰啟老伊。光緒七年。火山崩裂。煙燄冒出。灰水橫飛。幾滿歇羅城。城瀕東海岸今登啟老伊火山觀之。深壑下俯。烈燄上騰。積火成湖。蔽日燭夜。亦大洋海獨絕之景也。

初十日記

恭逢

皇后千秋節。謹率參隨等員望

闕叩頭遙賀。倫敦新報。葡萄牙有售出屬地之議。已

派員到倫敦與英廷商辦。其所欲賣之地曰吉尼。卽志略之畿內亞。阿非利加西土也。赤道之下。物產蕃衍而甚酷熱。英法皆有屬地。葡僅一隅耳。曰威達。製造局圖作懷塔。卽畿內亞之一地。東界英屬。西界德屬。曰卡本達。局圖作喀班塔。在阿洲東土之南。畿內亞公額河北。蓋河南。葡人擬兩大部。名載志略。河北蓋爾土。不相聯屬。故葡人欲割棄之。曰摩山比克。卽志略之莫三鼻給。壤地絕大。北界德屬之桑給巴耳。新屬於英者也。南界英屬之好望角東部。隔海大島。卽法屬馬達加斯也。而莫三鼻給海道。尤爲南北阿洲必經之路。英若不取。德

法必取之。現議以英金千二百萬鎊購之。曰諦模。卽志略之胎墨爾。在南洋各島中。澳大利亞洲北。葡得東半。荷蘭得西半。曰澳門。本中國屬地。而葡人租之者也。大約葡賣屬地。阿洲小部二大部一。南洋則兩小部。然澳門雖小。在中國視之。則關係絕大。且本中國之地。葡人擅欲賣之。尤爲無理。亦與近訂條約相背。已飭駐英馬參贊探聽實情。以便與葡人理論。

十一日記

佛家論宇宙爲地水風火四大合成。西人論地球之質。則曰土水氣火。土卽地也。氣卽風也。而洪範所列之五

行則又有金木而無風。夫金木不過土中所生之二物。洵不足與土水火相配。竊謂洪範之五行。祇就民生日用所最切者言之。是論其用而非論其體也。若論其體。則但云土水風火。而金木自包括在內矣。西士嘗論太空中地球。其始或由日中流出餘火。或係彗星所存之火。旋轉空中。終古不熄。亙數百千萬年。而火外漸生皮殼。包火在內。愈長愈厚。遂成堅石。久之而石在太空。不能不積受寒溼之氣。而其內又極熱。於是寒熱相搏。燥溼相乘。而石之上有泥。有沙。有砂子。三者生焉。久之而積泥稍厚。不能不生草木。草木腐爛。復爲泥土。積土益

厚。大地遂成。於是石之凸出者爲山。土之凹陷者爲川。蓋土之含孕既厚。未嘗不積收太空中。互數百千萬年之溼氣在內。而又與空中之溼氣相感。故能呼吸流通。其由沙土中噴涌而上出者爲泉。其由太空中凝潤而下降者爲雨。皆水氣也。地心之火。終古不熄。外與太陽之火。空中之火相吸引。其發而爲聲則爲雷。激而爲光則爲電。而鑽木擊石。無不有火。則地球之上。無處無火氣也。風則流行於空中。所以攝此地球而不墜。而水火之氣。亦未嘗不借風氣以運之。蓋自土水風火咸備而植物生。又久之而化生。溼生之物生。蟲魚是也。又久之

出使日記續刻

卷三

吳傳經樓校本

而卵生之羽族生又久之而胎生之毛族生最後人類蕃育而地球於是乎大成

十四日記

中國之在理教盛於直隸及東三省教有首領每年一會大較以不飲酒不吸煙不服豔服爲教規入教者皆秘密異常夫不告之妻父不傳之子至於喇嘛僧分爲紅黃二教聞有妖術能以咒語生死人然亦無目睹者白蓮教盛於昔日明季徐鴻儒之亂嘉慶間川楚教匪之變皆白蓮教也今則死灰不復燃矣此外邪教有所謂鐵圍教者當誦經之日不作粥飯惟製極大鐵圍羣

捧而噉之。有所謂果子教者。教中人納錢於教首。示期擺齋。咸集齋堂。喃喃宣梵。呬饑則啖果子。若獼猴然。竟日水米不得沾唇。夜分始散。有所謂大被教者。其首每年二次巡行各村。聚入教者於一室。製成大被。長短廣狹。恰與室符。夜集被中。默念南無阿彌陀佛。然深自掩飾。惟自稱喫素人。亦能爲人超薦陰魂。解禳星宿。始而鄉曲顛愚信奉之。凡遇喪病。延之諷經禮懺。且詆僧道爲不虔。繼而士大夫亦有崇之者。而大被之教。遂密布南方各州縣中矣。

十五日記

出使日記續刻

卷三

冠傳經樓校本

總理衙門函稱熱河朝陽教匪。或曰在理教。京津營口黨羽實繁。而萌蘖在津。此輩以勸人戒煙酒爲名。入教者吸其茶膏。雖老癮而七日可斷。每年銷售茶膏不少。其煎熬茶膏。向在口外蒙古草地。旣配他藥。亦挹草露。所以吸者有效。而其煎熬旣多。蒙古人漸以爲厭。彼教未必肯如民人租種蒙古地畝之例。主客之閒。遂成嫌隙。西教天主堂之在口外者。建昌縣之三十家子地方。華教士林道源爲最悍。在理之徒。自樹一幟。兩教相輕。讐怨日積。又值熱河春旱夏潦。收成甚歉。在理教匪乘馬賊出沒之時。託言與蒙古及天主教爲仇。揭竿爲亂。

始而放罕貝子被戕。府第被燬。繼而三十家子教堂被燬。林道源被殺。支解其尸。懸首樹上。又殺教民百十家。分股燔燬。平泉州教堂教士先遁獲免。關內永平遷安各教堂亦均與在理教挾恨。飛電北洋設法保護矣。

十六日記

有論中國物產甚富。宜設製造學堂。以教學生而謀富強。收回洋商所奪之利者。此固探源之論。不如此不足敵其腴削也。英國商務最精最廣。所屬如印度澳大利亞加那大。皆土沃產豐而少工作。英乃興其藝術。自機器行而成物愈多愈精。如洋布呢羽鐘表五金器皿。及

玻璃油皂針鈕一切日用之物。販運出口。所製洋布。其
棉花皆購自美國。所織之布。皆能仿效華製。而花樣牌
號。時時翻新。洋傘以綢製鋼骨牙柄者爲上。每柄須洋
銀五六員。或十餘員。中國到處通行。或用爲送禮之物。
洋燈以瓷罩保險燈爲上。價視尋常洋燈數倍。今中國
務本之道。約有數端。一廣種植以興農利。肥田之料。須
本西人格致之學。不特振興桑茶已也。一精製造以興
工利。如有能製新奇使用之物。給予憑單。優予賞賜。准
獨享利息若干年。不許他人仿製。而又酌其資本。代定
價值。一廣開采以裕民用。硝可肥田。金可範器。硫可製

藥煤可養火。均相地開采。加以鎔鍊。更設鐵路。散運各處。豈非收回利權之要道邪。

十七日記

凡人之心。虛靈不昧。非若肝脾肺腎之僅各司一職。故能用心者可至於聖。不能用心者可至於狂。誠以人之靈明。多在一心。其所以能思慮能記憶者。皆心也。此中國數千年來相傳之訓也。近古以來。亦有驗得悟性在心。記性在腦者。乾隆年間。齊次風侍郎博學多識。十三經二十四史。幾於背誦如流。後因翻車傾跌。腦漿迸流。高宗使名醫治之。補以牛腦。雖完復如舊。從此健忘。過

於常人經史及壹切典故無復記憶於是記性在腦之說乃益審矣泰西醫書及格致諸書咸謂人之記性悟性皆在腦余每晤西士詰以人之記性悟性在腦有何證據西士云人死之後每稱其腦凡其人生平愈睿智者則腦愈重焉愈愚蠢者則腦愈輕焉試之百而無一或爽又徵之於物牛雖大於猴然猴靈而牛蠢者以牛腦實輕於猴也兔雖大於鼠然鼠黠而兔慙者以鼠腦稍重於兔也亦試之百而無一或爽至心之爲用不過能由大小血管送血以通於腦以充於周身而身之百體活焉而腦之精氣足焉精氣既足而腦之思慮自益

鏡記憶自益牢。或有用思過度。以致血管迸裂者。則心血不能送入於腦。大抵血管盡裂。則其人立死。或裂其半。往往有中風不語。偏痺不仁諸症。稍久亦終致不治。其有調養得宜。使血管絕而復續者。不過十之一二耳。西士之說大旨如此。果若所言。是心不過頑然一物。雖與腦有相爲維繫之用。而其不獲自擅思慮記憶之能。可知。似與中國千古聖賢之說相背。然人雖終日思慮。記憶其妙用。究竟在腦與否。在心與否。人亦不能自知也。余旣不能實指腦之能思慮。記憶以證西說之確。亦不能實指心之能思慮。記憶以辯西說之誣。祇有暫置。

不論而已。西士又言人之神明在腦。人死則腦腐。腦腐則冥漠而無知。漸滅而無存矣。是中國之所謂鬼神。外洋之所謂靈魂。實皆無有也。余詰以鬼神靈魂。既皆無有。何以耶穌有天堂地獄之說。西士默然不能對。

十八日記

昨接總理衙門十五日電云。疆撫電坎巨提頭目報稱。英兵犯坎。於上年十二月初二日在卡外戰。據云英欲坎修路。不允起釁。續又電英兵與那格爾部戰。又與坎戰。十一月二十八等日。坎部頭目男婦五百餘人。逃至塔敦巴什卡外。查上年七月尊處篠電。英外部謂克什

彌爾築礮台。近坎境。非侵坎。今則明是侵坎。請卽詢詰外部。因何開釁。遽爾交兵。先行電覆。余以英兵之駐緬者。屢逾野人山。窺伺滇邊土司。又通匪濟械之梅生。判罰太輕。兩事須與英外部爭論。今坎事又棘。乃於本日十一點半鐘。挈繙譯武弁各一人。由巴黎啟行。赴喀雷海日渡海。至都甫口。以晚八點鐘抵倫敦使館。海中風浪甚大。余亦爲之嘔吐。頗覺疲憊。然巴黎倫敦同日得雪。疫氣當漸息矣。一月前疫氣最盛。倫敦每七日死七百人。巴黎每七日死三百人。

十九日記

申刻率參贊馬格理赴外部。晤首相兼外部尙書侯爵。

沙力斯伯里侍郎山特生及印度部侍郎一人議論兩點鐘之久坎巨提事沙侯云英廷萬無欲礙中國權利之意亦決不阻坎之進貢於中國但修路所以防俄乃欲罷不能之事坎酋出而攔阻咎由自取理所難宥余與往復理論乃云印度總督初議欲立坎酋之子未知究竟如何允發函電與印督妥商滇緬邊界事據云華爾身任滿將回秋間擬調歐格訥任之與中國商議分界之事余答以駐緬之英兵方出入滇邊致土司諸屬地騷擾不安恐卽啟釁不及待到分界沙侯允電致駐緬大員屬令小心勿生事端梅生判罪事則山特生言

之似有不肯加重之意。余擬俟其回文到時再行文與之辯駁。因先將坎事致電總理衙門云。咸電詰外部據云英兵修路通至礮臺。坎酋合那格爾攔阻英兵攻之。坎酋出奔。揚言偕俄兵恢復。印督以坎酋弑父虐民不能還。議立其子。尙未定。鈞署再向華使堅持。或辦到。

二十日記

新疆沿邊一帶界俄之外。又與各回部毗連。其附屬中國歲納貢金者。惟坎巨提一回部。坎巨提一名提維。每歲貢沙金一兩五錢。領賞大光緒十四年。據該頭目稟稱英屬溫都斯坦所屬之音底部。率眾入坎。欲奪其喀普駱駝地方。經邀同

納噶爾即那格爾併力拒戰。擒獲多名。而英公使華爾身照會。則稱並非音底部攻坎。實係坎酋糾同納噶爾頭目直入印度所屬之克什彌爾。攻撲喀普駱駝礮臺。逐去戍卒。該礮臺在克什彌爾境內。先於光緒二年被坎人逐去戍卒。仍前進攻。即被擊卻。坎巨提人屬克什彌爾。膽敢肆行滋擾。印度總督必不容其倖免等語。十七年。疆撫文稱英兵移駐奇里隄地方。距坎部僅四十里。並運有大礮。欲在彼修城。英人志在開通新疆西南一帶道路。以分俄人之勢。或欲借端併坎。自在意中。

西人謂一星卽一地球。殆經千百年才智之士測量推算而始有此論。與我中國舊說迥殊。余無以斷其說之或確或否。茲姑述西士所言。而參以余之臆見。更爲推而演之。擴而大之。夫星之布於太空者。無窮也。而日之陽力。足以引之。日之懸於太空者。亦無窮也。而太空之無外。無不容之。吾人目力之所能見。祇此一日。而不知目力之所不及者。尙不可以數計也。一日之力。能統攝羣星。星之質有大於吾地球十倍百倍千倍者。亦有小於吾地球十分百分千分者。惟日之大小亦然。日愈大。則所攝之星愈多。此固必然之理。日之爲體。似係純火。

亙古不熄。人不能測其所以然。而太空中之彗星。行星。常有被吸入日者。彗星亦純火也。行星卽地球也。議者以爲日之得此。猶火之添薪焉。昔釋迦牟尼與諸弟子說法。因云我與汝一說法之頃。不知多少世界成多少世界毀。夫佛氏所謂一世界。卽一地球也。地球之成。余前已言之。地球之毀。厥有數端。其最甚者。莫如被日吸入。或爲彗星之芒所觸。則立成灰燼。無復留遺。又或行失躔次。兩球相碰。其摩戛之力。足令全地生火。則人物銷滅。而球亦隕墜於無何有之鄉。然雖歷千萬年之流移隕墜。而太空之中。莫不有日有星。雖不爲此日所吸。

引而他日之力又足引之。浸假而生水土。浸假而生人物。而地球又成。又或因地中之火迸裂。以至飛隕。再閱千萬年。而地球又成。又或因地中之火漸寒。不生人物。雖流轉於太空之中。必閱千萬年後。別遇生火之道。始能復生人物。又或行失軌道。爲日所不照。而人物自息。必待千萬年後。再受日照。而人物復生。是故有以一地球而屢毀屢成者。有以一地球裂爲數地球者。有以小地球合於大地球者。有地球屢到將毀未毀之時。積久乃復成者。夫天漢大矣。實係眾星叢積而成。因其離吾地過遠。故其光在明昧之間。可見吾人目力所能見者。

地球殆如恆河沙數。余嘗盛夏露坐納涼。雖不過數刻。而天土常見流星。亦有空中有聲。光熊熊如巨燈。良久乃沒者。斯殆地球相碰。或迸裂所流之火。佛氏說法之言。於茲益信。然並非毀球之易。乃益見地球之多。且吾所見空中之光。未必全球俱毀。亦有地球一處炸裂。飛騰太虛。而全球實未壞者。其火或飛到吾地。則凝而爲石。人乃謂之隕星。然其流轉空中。如彈丸。如車輪。終古不消者。斯亦一最小之地球。但氣力太薄。則人物不生。偶行近吾地。則翕附於吾地。人見以爲隕墜。實則爲吾地之力所吸耳。或曰地球可毀之道。如此其多。然則吾

輩所履之地豈不危哉。余應之曰。吾地之在太空。殆不
僅如滄海之一粟。則所謂或碰或裂。或日吸或彗觸者。
並無數萬萬分之一。蓋行星被吸入日。西士亦不過設
爲此說。尙非實有所見。且空中諸地球。吾不遑論。但言
吾地。吾地所行之躔度。推步者能知大略。斷無日吸彗
觸之虞。大抵地球所慮。以地中火熄。或日光不照爲較
多。然就吾地而論。亦總在數萬年數十萬年之後矣。況
此係大數。雖造物者亦無如何也。又奚待乎子之杞杞
人之憂。

二十二日記

天圓而地方。天動而地靜。此中國聖人之舊說也。今自西人入中國。而人始知地球之圓。凡乘輪舟浮海。不滿七十日。即可繞地球一周。其形之圓也。不待言矣。若天之全體。則星也。日也。布滿於太空之中。太空無外。空之又空。至於不可終窮。殆不能以方圓言矣。西人又創地動日不動之說。以爲地球繞日而行。每日運轉一周。積年而繞日一周。而日則終古不動。其證據確鑿。亦足自暢其說。然則與吾聖人所謂天圓地方。天動地靜者。不大相刺謬乎。余謂西人所測方圓動靜。言其形也。聖人所論方圓動靜。言其道也。夫陰陽始終。寒暑往來。循環

無端豈非天道圓乎。華岱江河各有定位。不能移易。豈非地道方乎。圓之故出於動。夫日雖不動。而二十八宿之燦布於太空者。不能謂之不動也。且地繞日而行。安知非卽日之擊地以行。人旣在地。不能復測日之所以動。然西人以遠鏡窺太陽。見面有黑點。時時移動。故知日亦能自轉也。自轉則動也。方之故由於靜。鎮之以山而不重。流之以川而不洩。皆靜也。譬如大舟行海。舟中之窗戶几席。雖與舟俱動。而在舟中未嘗不靜。聖人在地言地。則謂之靜而已矣。或曰中庸有言。夫婦之愚。可以與知焉。及其至也。雖聖人亦有所不知焉。夫婦之不知

尙可以能行焉。及其至也。雖聖人亦有所不能焉。地球之圓。豈非今之夫婦所知。而古之聖人所不知乎。環遊地球一周。豈非今之夫婦所能。而古之聖人所不能乎。應之曰。古之聖人不能環遊地球。審矣。若謂不知地球之圓。則未必然。但未到其時。聖人不肯顯言。未涉其境。聖人不必贅言耳。坎巨提卽西域水道記及新疆識略之所謂乾竺特。胡文忠公一統輿地圖之所謂喀楚特。洪文卿侍郎中俄交界圖之所謂棍維。其實一地也。不過譯音之互轉耳。坎巨提回部轄眾八千人。那格爾回部轄眾約萬人。

二十三日記

克什米爾五印度極北大部也與格拉伯新格接壤近

年歸英保護在京師西經三十六度四十八分即英京東經七

十九度至四十二度五十八分即英京東經七赤道北

緯三十二度十七分至三十六度十五分全境居伊瑪

拉雅山平地東界西藏西名別南界俾及拔即本若印

西界俾及拔與阿富汗北界克拉考崙模山從東土耳

圖作喀喇方二萬五千英里居民前有七十五萬厥後

地震饑疫今僅存二十萬其地南分兩省一名克什米

爾一名拉達克跨伊瑪拉雅山兩旁內分五小部曰克

什米爾曰薄爾的曰及模曰克許塔華曰拉達克四面皆山川原中啟印度河諸水經焉境內峰巒層疊皆伊瑪拉雅山脈高者距海面萬五千尺以上東境最高之峰一萬七千八百三十九尺山道十二經歲冰雪無阻者四道而已有仵及爾山石作灰及鐵黑色有五金之礦全境水利哲拉穆江爲大入印度江有三水注之地既高寒終歲飛雪山地饒沃物產米爲大宗有大小麥珍珠米瓜果蔬菜蓮藕菸葉棉花油紙印度麻布之屬而蜂蜜尤佳土人偉軀有力婦女美容止善製絨巾販西藏羊毛織之運至外國最珍貴數年前出口歲約三十萬

鎊今已稍減。因麥赫拉社仿造也。餘如皮料馬鞍料紙。割玫瑰花油。刀件玻璃器寶石。皆爲出口之物。民多回教。千五百八十六年。全部爲挨開拔王攻取。乾隆十七年。屬阿富汗。嘉慶二十四年。屬錫克斯。道光二十五年。爲俘及拔之麥赫拉社大會管轄。其冬錫克斯攻英邊境。大敗英。遂進據拉花挨地。於是割皮斯陰杜斯兩地。及克什米爾全部。以抵所償兵費。而印屬格拉伯新格之北境。遂擴。然地雖屬英。民事皆歸自主。和約內英許彼此保護。以禦外侮。近數年內。聞克什米爾回王爲英所廢。別立一王。則克部自主之權。恐亦漸削矣。昨余

論天地方圓之理。尙有應補之義。乃前人所未詳者。夫地球滾滾。日夜旋轉於太空之中。故無不圓之體。卽日也。月也。及諸行星也。其理皆如是也。地球旣圓。而地面所發輕清之氣。積之旣厚。遂爲蒼蒼之正色。人之視之作大圓形。若近若遠。而不知所止極。則指而謂之天。今人乘輕氣球者。逾四十里。則不能復上。蓋其氣愈輕。則愈淡矣。以理度之。設令再上。越數百里。或數千里。漸輕漸淡。以至於無。恐并蒼蒼者。亦不可見矣。蓋蒼蒼之氣。爲地所發。包裹於圓球之外。故仍作大圓形。人一刻離天氣。則死。猶魚之不能離水。人日在天中。而不自知。且

又不知天之實與吾地球相依附也。若夫日也星也月也。則皆在吾地球數十萬里數百千萬里之外矣。人因隔氣以望之。疑其在蒼蒼者之中。而不知迺在蒼蒼者之外。昔人謂自地以上皆天也。此言最爲名通切實。蓋地上輕清之氣。固謂之天。太空之悠渺。亦謂之天。卽燦布太空中之日月星。皆謂之天。斯足括一大之義矣。余嘗見舟人以篙點水。暈而成紋。無不圓者。盆水起泡。無不圓者。又見人繫繩於竿。繫物於繩而急旋之。無不作圓勢者。此無他。依天地自然之形也。又嘗觀人之首。與夫目之睛耳鼻之孔。無非圓者。草木之枝幹。無非圓者。

此無他得天地自然之氣也是故論其道則天圓而地方論其形則地圓而天亦圓惟太空則無可名焉

二十四日記

緬北野人山地在厄勒瓦諦江以東者四分之一與雲南接壤除八募一處外其餘野人山地距赤道北二十四度以上在厄勒瓦諦江以西者四分之三距赤道北二十四度二十五分以上中英如將野人山地對分似可以適中之地距北京西五十度三十八分爲界即英界六十五度如以厄勒瓦諦江爲界中國少得地南北六百里東西二百里又江源尙難確據細流改道亦所時有

可用人力指東說西。後必多事。不如以經緯度立界爲
填塞改道。美國北界除太湖外皆以緯度爲憑。舊說謂天有九重。最近者日月

輪天曰水星天曰金星天曰日輪天曰火星天曰歲星
天曰填星天曰二十八宿天。最遠者曰宗動天。宗動天
已爲人之目力所不到之界。故不能見其星。是人力所
能窺測者僅八重耳。惟金木水火土五星皆繞日而行。
地球亦繞日而行。而月又繞地球而行。是此七重天者。
實一重也。再合之地球則八重而爲一重。又火木二星
相距軌道之間有十四小行星爲一重。又填星之上有
天王大星爲一重。再上海王大星爲一重。是十一重而

爲一重矣。其餘繞吾日之諸小星，爲遠鏡所不能見者，當尙不可勝計也。若夫二十八宿諸星，離地已甚遠，因其光甚大，故吾地之人能見之。西人謂之定星，實皆日也。日之旁亦有行星有月，西人用遠鏡測之，雖能窺見一二，然恐其不能測者尙多。是知此一重天所占空界甚遠，其或以一重天而分爲數重，或十數重，固理之必然者也。然則舊說所謂九重天者，質言之則爲八重。夫宗動天統言之，不過兩重而已矣。觀吾日所居之一重天內，如水星直徑長九千里，離日有一萬萬里；金星直徑二萬三千一百里，離日有二萬萬里；其他諸星相距之遠，

大抵類此。夫以九千里及二萬三千里之直徑。而位置於一萬萬里虛空之中。宜其升降上下。無所阻礙。即使有不能窺見之小星。繞於其旁。必有互相維繫。互相吸引之理。斯所以能終古不離不忒。不碰不隕也。吾又嘗以理度之。凡吾地之上下四旁。可見之星。有十餘重。可見之日。有兩重。則推之至宗動天之中。並出乎宗動天之外。其虛空之界。無終極也。虛空之中。有日有星。亦無終極也。竊謂有日有星之天。雖擴之千重萬重。萬萬重而莫能窮其究竟也。是以聖人存而不論也。接總理衙門二十二日來電云。疆撫電英令那格爾與坎修道。

通帕米爾坎那合兵拒英不勝英遂據那坎逃眾已至
塞勒庫爾坎酋欲奔俄請援被英防阻查坎入貢中國
已久該酋卽有不是英應與我會商豈宜徑自加兵且
謀廢立上年俄兵入帕本署電知竹使告俄外部卽允
撤兵並告該督以後勿令弁兵越界今英侵坎勢將及
帕俄人豈肯甘休希向外部辯論英如佔坎俄必佔帕
我無詞拒之應卽速電印督阻止其兵勿待俄人有詞
也申刻余率參贊往晤沙侯照總署意致詰約議論一
刻返署卽復總署電云外部似疑我置帕度外乃先動
手告以在帕立界牌修墩台派兵巡歷彼欣然稱立電

印督妥商回覆。又云。我受坎貢甚微。無管轄權。實非屬國。合先聲明。復與力辯。彼始無言。

二十五日記

帕米爾居中亞細亞之中。爲全地球最高處。其平原之高計萬三千英尺。東接天山。南接伊瑪拉雅及興都哥士山。過脈之嶺。南距平地四千至五千尺。最高峰離海面二萬五千五百尺。兩山毘連處多深谷。故名曰帕米爾。西界陡下。卽圖爾齊斯坦。一譯作土耳其及斯登沙地。又作薩爾都斯丹。也。全境勢如建瓴。天氣寒暑皆酷。并多大雪及大風雹。扣歇石之地。入夏爲羊牧場。販者麇集。地名稱著。買克

破羅人至扣白拉坑亦必經此地產鳥獸甚夥馬勿隆
羊類一種卽出此水道交錯河之大者一名坎勒克爾面積
百二十英方里一名歇佛可爾面積百方里

二十六日記

余昨擴天有九重之舊說以爲天實不止萬萬重其說
似奇而創然中庸已先我言之矣中庸言地曰及其廣
厚言山曰及其廣大言水曰及其不測獨言天則曰斯
昭昭之多及其無窮也日月星辰繫焉萬物覆焉夫曰
無窮則雖擴之萬萬重而莫能窮其究竟也余之前說
不過無窮兩字之注腳也余又曾論日月星相繞相吸

之理則一繫字之注腳也。至余所論諸星位置於虛空之中。升降上下。無所阻礙。所以能終古不碰不隕。則又爲道並行而不相悖。一句之注腳焉。夫然後知聖人雖有所不論。而一字一句。義蘊宏深。實已無所不該。余又讀聲名洋溢中國一節。舟車所至。人力所通。天之所覆。地之所載。日月所照。霜露所隊。凡有血氣者。莫不尊親。故曰配天。始確然知後之聖人。必有統壹五大洲之一日。而孔子之道。亦必徧行於五大洲。爲所尊親無疑也。抑余又在外洋閱歷二年。深有味於論語子張問行一章。忠信篤敬。蠻貊可行。實爲顛撲不破之道。嗚呼。聖人

之言何其神也。帕米爾在中國之喀什噶爾。俄國之圖爾齊斯坦及布哈爾與都哥士喀喇闊魯穆之間。一在東面。係高阜之地。一在西面。係多山之地。自赤道北三十六度四十五分起。至三十九度四十五分止。京師西四十度五十三分起。至四十七度零八分止。東面之地。有七萬法方里。居民二萬戶。西面之地。有八萬法方里。居民五十萬戶。其中北面有喀爾提錦達爾瓦斯。南面有羅善什克南巴達克善諸小部落。有山地方則爲草地。帕米爾蓋兩帕米爾地處高山之中。北有天山。南有喀喇闊魯穆山。西有中亞細亞大嶺。又通至伊瑪拉。

雅山即驛山

東有崑崙山。又通至喀什噶爾山。雖高地諸

小部自古未有著名大國。然唐貞觀中元奘法師求經西域時。帕米爾已有什克南及羅善等國。此自主高地諸小部周圍有大國環之。如浩罕布哈爾阿富汗喀什噶爾皆是。因之達爾瓦斯屬於浩罕。哈薩爾屬於布哈爾。瓦罕羅善什克南屬於阿富汗。而喀什噶爾爲中國所得。浩罕布哈爾爲俄所得。今帕米爾遂成中俄阿富汗平分之地。中國有塔哩穆江岸及塞勒庫爾高阜一帶。俄有阿來嶺及哈爾果什高阜一帶。蓋帕米爾高阜地方除爲俄所據外。皆屬中國也。什克南達爾瓦斯各

土番稱其頭目曰伯克。樹土爲城。駐兵其中。土番納稅受役。維謹例貢於伯克者。有雞羊呢衣木鞋盤鏟油麵之屬。及鐵五斤。

二十七日記

或戲問於余曰。洋人創造火輪舟車及電綫。巧奪天工。遂能將五大洲聯而爲一。自明以前。華人豈知歐美諸洲。尙有絕大世界乎。今人於地球已能徧歷矣。然智巧日生。器用日精。卽如輕氣球之屬。尙可開拓。其用漸臻美備。意者數千年後。必有窮極造化之妙。爲人思慮所不到者乎。如謂行星卽一地球。究竟與吾地相離過遠。

人力所不能達。惟月輪距地最近。意者吾地之人。必有到月輪中通商之一日乎。余曰。西人所恃以奪天工者。多藉水火風電之力。若太空之中。則水火風雷俱無矣。惟日星之光。或尙可借而用之。然吾恐光之爲力。不如水火風電之力之大也。且西人嘗乘輕氣球矣。四十里以上。則鼻中出血。漸致暈絕。蓋人不能一刻離氣以生。去地稍遠。則地上所浮清氣。漸輕漸淡。以至於無也。月輪離地雖近。尙有六十九萬四千餘里之遙。人安能飛度此六十九萬餘里無氣之界乎。是故謂地球之上。將來尙可尋得五島。實在人意料之中。謂月輪中可以通

商則吾不敢知。福州茶務向來最旺。十年前茶葉販運英國者。值英金七十一兆鎊。去年僅值十九兆鎊。

二十九日記

余觀西洋人議論及其律例。大抵最重姦盜拐騙之罪。凡犯此者。雖平日密友。皆絕不與往來。恐被洩也。而懲治之法。雖不抵死。亦必與以終身監禁。苦工之罰。蓋猶中國所謂私罪也。至於隱圖弑逆篡奪。或謀爲君主。或要結眾心。謀爲大伯。理璽天德。雖未成發覺。亦祇驅之禁之而已。不甚予以重辟。而輿論非惟不貶絕之。轉有欽佩其爲英雄者。蓋猶中國所謂公罪也。夫大逆不道。

不能不重其辟者。所以定一尊而禁邪謀也。故勝則爲王。敗則爲寇。古今通義。今西人則於其敗者。並不指爲寇焉。人孰不思僥倖以希神器哉。卽如法前兵部尙書布朗熱謀爲法國君主事敗出奔。而法人之諷思者至今未衰。並不斥其覬覦之罪。歐美諸國若此類者。不勝枚舉。此不知春秋大義之故也。臺北暖暖地方新得金礦。礦沙四五十里。無不出金。淘沙者日三千餘人。晨往夜返。有人購金沙數十兩。黑沙數兩。化分攷驗。大約純金得十之八。一分半爲純銀。硫質炭質五六釐耳。黑沙則純金可得十之三四。惟化煉稍難。

二月庚寅朔記

韃爾剌斯丹之地在伊瑪拉雅與興都哥士兩山相接處克什米爾巴勒特斯坦志略作巴勒提之西阿富汗之北興都哥士山之東之南地圖或稱爲噶甫利斯坦皆韃爾剌人居之其地亦名巴勒提亦名小西藏自東而西有四百啟羅邁當其東西及中間一帶自幾勒幾山谷起至身壽江止已入克什米爾其餘各地尙稱自主號爲亞什斯坦北南面分爲小部落或爲小民政國各有酋長那戛爾韃爾剌斯丹村也在雅辛東南幾勒幾河左支棍雜河或名那右岸塞勒庫爾一作薩雷圖勒

中國圖爾齊斯坦之地。爲帕米爾長形高阜處。在赤道北三十六度四十五分。至三十九度三十分。南北長三百六十啟羅邁當。東西寬二十至五十啟羅邁當。會城曰塔什庫爾。譯言石山也。城內居民一萬七千五百人。其餘散居村莊。地爲邊境孔道。居民波斯種較多。雖屬中國管轄。然不過羈縻而已。

初五日記

中國上古之聖人不可攷矣。其可攷者。伏犧神農黃帝少皞顓頊帝嚳堯舜禹湯文武周公孔子。皆聖人也。而皋陶稷契伯益伊尹傳說召公太公顏曾思孟。亦聖人。

之亞也。宋之周二程張朱五子亦未必非聖人之亞也。是中國五六千年以來可稱大聖人者十四。稍亞於聖人者十七。其大較也。而伯夷柳下惠之聖。尚不計焉。歐洲各國自耶穌未生以前。則奉摩西爲聖人。耶穌之後。則但知有耶穌而已。其說以爲後之聖人較前之聖人尤精尤備。則前之聖人可勿道也。至如耶穌之弟子曰彼德曰保羅者。西人亦以聖呼之。然不過因稱誦耶穌而兼及之。西人之敬耶穌如天。殆有統於一尊之意。今耶穌之教盛於歐美兩洲。而亞洲阿洲亦頗行之。生耶穌之前者。則有釋迦牟尼之教。近尙盛於亞洲。生耶穌

之後者。則有謨罕默德之教。今行於歐亞阿三洲。此三人者。皆中國以外之聖人也。若論其所行之地之廣遠。則耶穌之教爲最。回教次之。佛教又次之。余於此三教。未暇攷其深淺。然如謨罕默德者。不過以市僧而兼姦雄耳。稱說天神以愚弄其徒。不服其教者。則興兵以擊之。其所以得尊爲聖人者。大都恃智力以取之。非眞聖也。余姑就彼教之所謂聖者。則聖之而已矣。雖然。釋迦牟尼生於印度。耶穌生於猶太。謨罕默德生於阿喇伯。皆在亞細亞洲境內。而歐美諸洲。從古無一聖人焉。意者。其人之生性。長於形而下之器。究不長於形而上之

道歟抑天地清淑靈秀之氣鍾於亞洲故篤生中國諸聖人之外復以其餘力啟彼所謂三聖人者歟而耶穌之庇蔭泰西尤宏矣。今俄國及美洲之北冰海所出獺皮甚多獺在層冰之下捕魚爲食然不能吸受天氣捕獺者鑿冰爲洞獺遊行其下甚覺舒暢漸至洞口吸冰外之空氣人伏伺於洞邊見獺則以鐵叉取之百無一失然後知所謂南北冰海者皆不過結冰於上面而下至水底則仍有溫氣故可不凍也但地愈寒則凜烈之氣愈盛斯結冰愈厚耳

初六日記

余於初三日接總署電謂坎酋卽有罪能從寬不廢最善必不得已而立其子亦須疆撫派員到坎與英會辦等語卽遣馬格理往告外部外部旣聞此說大不謂然謂光緒十四年華使照會總署早已聲明坎事當時並未駁回中國向不管坎事今忽欲干與已未免多走一步旋聞印度總督回電已到願存坎而立其子外部亦不來告及往詢則云因有續議難送回音大有并翻前議意今日余往晤沙侯索印督回音沙侯仍僞云未到於是與之辯論磋磨約五刻之久始允仍商印督立坎酋之子由中國派員赴坎會同英員選立後不援以爲

例。前輩論洋務者。每謂美國自守一洲。並無蠶食鄰封之意。其人亦和平公正。願親中國。可以結爲強援。有非之者。曰。彼旣但知自守。雖於中國初無惡意。又惡能爲我援哉。此說是矣。余謂驅逐華民之事。他國之人所顧忌。公法而不敢爲者。美人獨悍然爲之。澳洲之人始出而繼之。雖曰埃利士人之意。然行其一切新法者。美之政府也。大抵民主之國。政柄在貧賤之愚民。而爲之君若相者。轉不能不順適其意以求媚。夫至可憑者民情也。所謂天視自我民視。天聽自我民聽也。至無定者亦民情也。彼其人雜言靡識。卑量隘。鼓其一往之氣。何

所不至。是以不能無待於道之齊之也。美國之政。惟民是主。其法雖公。而其弊亦有不勝枚舉者。卽如他國公使。很愎固多有之。而美之前使西華。獨以驢貨著名。每受商民之賂。屢與總理衙門饒舌。甚有駛兵船以肆挾制者。余在浙海關道任內。惟美領事司提文動多挾制。意在助商人以訛索。徐詢其故。則因彼國家給俸過輕。不能不事搜羅也。客歲教案。惟英法兩國教堂多遭焚燬。而美教士之受損者無聞焉。乃彼不惟不自慙其前此迫逐華民之舉動。轉有派兵船責問之說。然則謂美國之可親者。其義果安在哉。夫然後知數十年前。美與

出使日記續刻

卷三

主 傳經樓校本

中國交涉之情形。或不至如英法之構怨。若至今日而謂美可恃爲援者。皆耳食之談也。皮相之識也。

初七日記

袁爽秋來信云。俄使喀希尼照會。引雍正五年俄使薩瓦在

太和殿觀見故事。稱欲在

宮內首殿觀見遞國書。李梅亦云然而

旨意已定在北海之

承光殿。屆期李梅稱病。函請改日。喀使則照稱外部令其照成案。託總理衙門代遞國書。現已函致許竹簣星

使詢商俄外部矣。

初八日記

十一點鐘率繙譯武弁等坐汽車於一點鐘抵都甫海口登舟渡海。二點二刻抵喀雷海口登岸復坐汽車於七點二刻抵巴黎換馬車八點鐘抵使館。是日海中風靜波平天日晴麗惟值兩次降雪之後寒氣侵人。英士有核計地球人數者亞細亞東方教人共八萬七千四百萬人回回教一萬七千三百萬人猶太教八百萬人天主教一萬九千五百萬人希臘教八千五百萬人耶穌教一萬三千五百萬人全地球統共有十四萬七

出使日記續刻

卷三

主 傳經樓校本

千萬人

初九日記

余因坎巨提事致電總理衙門云。磋商數日。彼慮我會辦堅。靳前議。現與言派員會立其子。顯兩屬明證。彼允商印督稱回音難速。或囑華使要求他事。現宜堅拒。爭與邊及梅生事。如華使探問。請答以交敵處辦理。禁軍火。當照商展限。法有事暫回法。近十年來。英國每年所用之費。酒一萬三千六百萬鎊。麪包七千萬鎊。牛奶油。牛奶餅三千五百萬鎊。牛乳三千萬鎊。糖二千五百萬鎊。茶葉加非等二千萬鎊。房租七千萬鎊。田地租六

千萬鎊。絨貨四千六百萬鎊。棉花貨一千四百萬鎊。學堂費一千一百萬鎊。竹布貨六百萬鎊。行教費一百零五萬鎊。

十一日記

緬甸海口有三埠。曰暮爾綱。

即馬爾達般

曰德瓦。

一名吐瓦

曰丹

老

本暹羅濱海西境

以漾貢握其總核計海口華商約二萬四

五千人。巨商則閩多於粵。至沿江各埠生涯全屬滇人。計輪船停泊裝卸貨客之大埠二十三。小埠二十九。而滇商之眾首數阿瓦約萬二千人。次則新街猛琪不下五千。其餘各數十百人。至行商貨駝年常二三萬。秋出

出使日記續刻

卷三

三 傳經樓校本

春歸。緬之藪澤利源多在土夷土司境內。該境兩倍
腹地。自東北而西南。共分九十九司。其境廣民殷。以省
賦爲第一。然江東慕乃錫卜。似卽聳澤穩祚摩谷勒洽
錫箔澤抓南坎九司。亦爲富庶衝要之地。省賦卽木邦也。緬
人改易其名。猶猛密改爲摩媒。新街改爲八募也。木邦
蠻暮猛琪同爲內屬之三司。書志可攷。

十三日記

自普法戰後。法人始知白鴿傳書之妙用。足補電綫所
不逮。國中礮壘。無不繫鴿。講求教道馴熟之法。今就通
國計之。約有馴鴿十萬頭。巴黎約有八千頭。其畜之籠

中而待訓練者約一萬頭。近又知燕子能認故巢。亦將
練爲有事之用。法國人特司保尼者。陸盤克地方人也。
曾將教練之燕子。由法京縱之而歸。竟能至於其家。雖
路隔一百四十英里不誤也。與鴿並飛。又能略速。是燕
優於鴿矣。法人欲得暹羅魯萬弗來拔地方。今法兵
已將踞之矣。法兵之在越南暹羅交界者。又時越界以
與暹人爲難。魯萬弗來拔。在瀾滄江之東。地名而亦省
名也。亥正率慶霽堂吳挹青王省三應法總統之請。
東赴王宮觀跳舞會。子初返館。

十四日記

英與荷蘭所議婆羅洲島分地之事。今已定約畫押。其地自極西至英京以東經度一百十七度。又自北緯四度二十分而至海。復經雪拔的克一島之北。皆屬於英。餘仍屬於荷蘭。此英荷中分婆羅洲地之始也。英國阿爾蘭人七十年前戶口居英三分之一。乃去年丁冊。僅居英國戶口八分之一。蓋以輕去其鄉。出洋謀生者之多也。

十五日記

古巴一島。自明宏治四年。義大利人之仕於西班牙曰可崙波者。卽可崙比亞航海覓而得之。移民設官。遂爲藩屬。

其地南近赤道與臺灣相準而幅員三倍於臺灣分爲
六省土客居民合計一百四十餘萬人設總督一員巡
撫六員提督一員額兵二萬七千義勇六萬六千物產
以蔗糖菸葉爲大宗合之五金木料藥材每年出口貨
約值銀九千萬員而出入貨稅收至五千餘萬員從前
西班牙視爲外府取其羨餘以贍國用近來用人多弊
商務漸衰所入僅敷所出自道光季年華民聞古巴易
於謀生陸續前往截至同治十二年止來古巴者共計
十四萬三千有奇光緒六年查辦以後華人始知古巴
官吏之苛虐裹足不前今虐政雖革華人僅有四萬餘

名爲商者百之一其餘盡屬傭工古巴西偏夏灣拿省康熙三年法人破之乾隆二十六年英人踞之乃割北省靈羅列打以賂英始罷兵而去同治六年土人以稅重起兵與防軍血戰不勝而罷

十七日記

西人之以姓氏行猶華人之以姓名並行余旣誌之矣乃中西之俗又有不同者中俗以直斥其名爲賤簡之意西俗非尊而敬之則不呼其名凡尋常之人祇有姓氏卽或有名而人亦未必知惟曾封五等之爵及賜寶星者始以其名冠於姓上一國之人有尊之之意始兼

呼其名姓。尤尊之者。乃置其姓而獨稱其名。至於用其名以名其子孫。名其鳥獸。名其器具。而敬愛之意。乃愈摯矣。故西人有以父母之名。名其子孫者。人卽謂之孝於父母。以其不忘父母也。卽如英國今之君主。名維多利亞。雖未必卽係其幼時之名。大約介於名與號之間。英人或以名其舟車。名其狗馬。名其廠棧。名其山澤。而其國家功令。非但不以爲禁。且轉表其有尊君親上之志焉。此殆與周人諱名之訓相反。雖有殷人尙質之意。然而近於野矣。

十八日記

泰西諸大國自俄羅斯而外無不有議院。實沿羅馬之遺制也。其所由來數千年矣。議院者所以通君民之情也。凡議政事以協民心爲本。大約下議院之權與上議院相維制。上下議院之權與君權相權相維制。英國有公保兩黨。公黨退則保黨之魁起爲宰相。保黨退則公黨之魁起爲宰相。兩黨互爲進退。而國政張弛之道以成。然其人性情稍靜。其議論亦較持平。所以兩黨攻訐傾軋之風尙不甚熾。而任事者亦稍能久於其位。法國有左右中三黨。而三黨之中所分小黨甚多。又有君黨民黨之別。其人皆負氣好爭。往往鬬然不靖。凡宰相所

行之政議院中是之者少非之者多則宰相必自告退
宰相退而其所舉之各部大臣莫不告退由伯理璽天
德另舉一人爲宰相其被舉者必先自審其黨友之中
可爲各部尙書者若干人若尙闕而不備則必力辭不
敢居位而伯理璽天德又別舉焉法自庚午年改易民
政二十二年之中已易相二十七次其人雖多喜事而
強橫之勢稍遜於前者亦實由此夫宰相不能行其意
則告退頗有不得其職則去之意一相退則眾大臣牽
連而退一相進則眾大臣彙茹而進亦稍有中國古風
然一國中之有才德聲望眾所願推爲宰相者不過數

人可屈指而計。既進不難驟退。既退亦常復進。卽如法之現任兵部大臣弗來西尼。已三爲宰相。五掌兵部矣。

十九日記

中國有惜字會。大抵始於學士文人。其說以爲文字者。聖賢之精神。造化之機緘。而一切立德立功立言之秘要。賴之以傳者也。敬之惜之。罔敢褻也。罔敢棄也。此風不知始於何時。大約一二千年以來。相承久矣。無論智愚賢否。貴賤皆知存此心。偶有不知此義而穢褻字紙者。則鬼神罰之。雷霆殛之。雖半山因果家附會之談。然亦有威靈顯著。爲眾人之耳目所共聞見者矣。泰西之

俗則不然嘗見有身坐車中閱新聞紙隨閱隨棄任其
拋擲於溝渠汙穢之中不問也或揩洗器物皆用字紙
男女如廁無不攜新聞紙爲拭糞之具雖西人皆知敬
畏上帝從無以穢褻字紙而受罰於上帝之說豈蠲行
之體不如蟲書鳥篆之根源字母所拼不如會意象形
之體製乎然其爲道術所寓學問所寄政教號令所繫
事物記載所關則一也余謂惜與不惜存乎人心中國
風氣人人皆知惜之則天地鬼神亦從而惜之偶有一
二不知惜者造物亦得致罰於一二人以儆其餘若外
洋則本無此風人人皆不知惜而天地鬼神之威亦有

所窮則聽之而已矣。然中西風氣必有大同之一日。則惜字一會亦必由東而西。其在數百年之後乎。

二十日記

泰西風俗無男女之別。余意其自古以來相沿久矣。而正不然。聞三四百年以前。法國某王始改婦女之禮。其用意專以謀致富強爲主。而歐洲諸國從而效之者也。古者歐洲婦女守禮之嚴。大旨亦與中國相似。男女不同席而坐。不共几而食。恪循閨訓。不出戶庭。法王思致富強之術。莫先於人民之繁庶。繁庶不可驟幾也。則莫如化婦女之無用爲有用。欲求婦女之可用。則莫如略。

其禮法去其防閑於是毅然以改俗變禮爲務其初不得不用非常之勸懲驅迫於無形之中厥後風氣寢成而婦女之爲用果不異於男子用之戰守則男子荷戈婦女饋餉矣用之學問則男子精銳婦女沈靜矣於是通國之中向之有十萬人者不啻驟得二十萬人向之有百萬人者不啻驟得二百萬人此由於地不甚廣民不甚眾而欲創霸國之雄圖不得已而出此也迨其計旣行其效旣著歐美諸洲各國無不效之今各國之人視爲當然漸忘其所以然且有見中國之禮而笑之者矣俄羅斯在西洋之中風氣較晚其改婦女之禮始於

彼得羅皇帝亦已二百年矣。西俗讌會則男女雜坐。行步則男女攜手。俄之婦女初有不願者。至殺數人。而其風始漸開。然至今俄國皇宮茶會。男女猶分列左右兩行。非若他國之男女雜還。則較之諸國。猶稍存古意焉。

二十一日記

阿根廷國。卽志略之拉巴拉他。巴他義拿在南亞美利加之南境。拉巴拉他者。阿根廷之大江。又爲不宜諾塞利。都。阿根廷之首府。阿根廷今爲合眾國。幅員多未開之土。共得一百十二萬五千八十六英方里。明嘉靖間。西班牙人開爲屬土。全境舊爲秘魯之一隅。嘉慶十五年。

上海人民广播电台

不宜諾塞利建於拉巴拉江口。爲絕大海埠。氣象闊
闊。民多天主教。而他教亦不禁。

二十四日記

巴拉圭民主國在南亞美利加腹地。國以巴拉圭江得
名。江流自北而南。分全境爲二。稱曰東西巴拉圭。東巴
拉圭爲巴拉圭正界。在赤道南二十二度至二十七度
二十分。京師西一百七十度二十九分。至一百七十五
度九分。幅員得九萬九千英方里。與巴西阿根廷二國
爲鄰。西巴拉圭居丕耳考美看里約內。喬洛二江口之
間。西與玻利非亞接壤。幅員約得十四萬二千英方里。

巴拉圭於明嘉靖年間。西班牙闢爲屬土。爲秘魯之一省。

本朝嘉慶十五年。南美洲各國皆叛西班牙。改爲自主。巴拉圭亦成自主國。同治四年至九年。與巴西阿根廷。烏拉圭構兵不勝。乃議和。戶口耗去十分之八。人數僅有二十二萬一千。國債英金四百七十萬四千餘鎊。鐵路尙不甚多。物產則巴拉圭茶銷售甚繁。又多印度麥米。加非。橘。菸。蔗。靛。青。藥材。蜂蜜。蜜蠟。染絳之蟲。近來商務蒸蒸日上。出口貨值英金五十九萬七千餘鎊。進口貨值三十四萬四千餘鎊。國家歲入款八十二萬四千

餘鑄出款約如之。教務以天主教爲大宗。

二十五日記

湖北江夏縣之馬鞍山煤礦。自辛卯夏開採以來。出煤極旺。大冶縣之界山。出煤亦佳。又興仁港地方煤苗頗旺。現正開挖。用泰西機器鑿孔之法。做井字架掘採。而下工省利倍。各礦煤炭質極佳。可供輪舟生火之用。官設礦局。委員監銷。無論紳商。准自集資本採販。去臘帆船絡繹運出之煤。數百萬石。載往湖南江皖銷售。黃石港下游道士洲。設有官局。監督銷售。以兼顧運出長江之總口。黃石港內數十里。某山銅苗極佳。富池口有銀

山者苗亦甚旺。均議籌款採鍊。去年英國各口岸與東方互市之數。由英運華花紗。比上年約少一百五十萬磅。疋頭約少三千六百萬碼。惟羽毛織造之物。比上年略增。錫及鐵路等料。亦遠遜於前。華茶運英。以銀數計。比前年約少四十萬磅。華糖停止運英。已兩年矣。

二十七日記

泰西各國專設郵政大臣。歲俸至少亦英金一千五百鎊。其下有文案記錄官。有專司收發員弁。中國總稅務司赫德。曾於海關創爲郵局。寄送各處信件。一例洋碼五分。僅寄本處。概取二分。英國郵局章程。有散封。有

密封、密封者，要信文件是也。每重一兩，寄費約洋一分五釐。散封者，書籍日報是也。每重一兩，約洋五六釐。皆須豫購信牌。華人謂之人頭，西人譯稱憑印紙。粘貼其上，如信貲一分者，則粘一分信牌。由此加多。如有重價要件，匯單銀票，當向郵局掛號，多出掛號之費，取回收執照，謂之保險。但保險之價，不得逾百鎊之數。

二十八日記

墨西哥爲北美洲最南之國，係聯邦民主，合小邦二十七。總部一，屬部二，而成一國。南北袤二千英里，東西廣自一千英里至一百三十英里。國在美洲爲最古。關於

李唐之世其民勤能任事學藝皆精明正德間西班牙
取爲屬地礦產甚富西人驅土人採之而坐收其利道
光元年始逐西人爲民主國幅員之廣幾等於英法德
奧及馬加五國通國計七十五萬一千二百六十九英
方里人民十一兆四十八萬七千二百十

二十九日記

墨西哥境內大半高原最高之嶺皆高於海面一萬數
千英尺諸火山皆已熄滅國中礦產甚富開採最早銀
礦所獲尤豐自前明嘉靖至今日所鑄金洋員一百十
四兆三十八萬有奇銀洋員三千一百五兆九十七萬

有奇。國中有鐵路五千五百英里。大半爲英商公司建造。國債有英金十兆五十萬鎊。每歲進口貨值洋銀四十四兆五十萬員。出口貨值六十兆十五萬餘員。各類礦質出口數。歲計洋銀三十八兆七十八萬餘員。國政大致同米利堅。伯理璽天德。一人四年一舉。歲入之款。約英金四兆九十六萬餘鎊。歲出五兆八十七萬餘鎊。通國電綫三萬二千四百英里。德律風綫四千三百英里。民間多奉天主教。而境內絕少教堂。耶穌教亦興盛。又有墨西哥新教。其源蓋出於耶穌教云。

出使日記續刻卷三終